

AWEMainta

E DIFERENCIA DEN NOTICIA

AUMENTO DI NIVEL DI LAMA:

COSTA DI ARUBA DEN PELIGER



2

SALIDA GEOFFREY WEVER
**TA MUSTRA MOCION
DI DESCONFIANS CONTRA
LIDER URSELL ARENDS**

3

E PESO DI UN BATAYA
LEGAL PROLONGA:
**80 LUNA DI INCERTIDUMBRE PA DOS
SOSPECHOSO ABSOLVI Y NAN FAMIA**

4

TURISMO SOSTENIBEL:
**HYPE DI MERCADEO
OF IMPACTO REAL?**

6




WHAT VS WHERE?

Stop Searching!

M-Files
Document Management

- System Neutral, Metadata Driven
- Cloud, On-Premises, or Hybrid
- Automated Workflows and Security
- Seamless Integration with: Microsoft Office,
- Dropbox, GoogleDrive, DocuSign, AdobeSign

Tel. 583-7072 | info@vcc-int.com | www.vcc-int.com



VCC
International NV

Aumento di nivel di lama:

Costa di Aruba den peliger

CAMBIO climatico ta lagando su rastronan, y un di e menasanan mas grandi cu Aruba mester enfrenta actualmente t'e aumento di nivel di lama. Mientras cu mundo ta preocupa cu asuntonan economico y politico, e oceano ta subi constantemente y ta trece consecuencianan devastador pa islanan chikito manera Aruba.

Loke por parce aworaki ta pasando lentamente, tin e potencial a largo plaso pa no solamente afecta nos beachnan bunita, pero tambe henter e sector turistico y e comunidannan cu ta depende di dje.

Consecuencianan pa beachnan di Aruba

Nos beachnan t'e joyanan di Aruba. Eagle Beach y Palm Beach, atraccionnan turistico popular, ta sinembargo directamente den e linea di candela di e aumento di nivel di lama menasante aki. Aña tras aña, e costa ta disminuyendo lentamente door di erosion, un consecuencia directo di e aumento di e oceano y tormentanan mas frecuente cu ta laba e santo bay. E consecuencianan? No solamente turistanan lo scoge otro destinacionnan, pero comunidannan local na costa tambe lo wordo confronta cu riesgonan aumenta di inundacion.

Si no haci nada, den futuro nos por spera cu beachnan simplemente lo desaparece den lama. Y no lubida cu e sector turistico na Aruba ta depende pa un gran parti di e beachnan aki. Sin un plan solido pa proteccion di costa, e entradanan di turismo, cu ta forma e columna vertebral di nos economia, lo disminui drasticamente. Turistanan cu ta buscando e soño di un vakantie na beach, no lo bin Aruba mas si e beachnan ey no t'ey mas.



Gastonan halto di proteccion di costa

E realidad ta cu proteccion di costa ta un asunto costoso. E aumento di nivel di lama lo obliga Aruba pa inverti sumanan halto den medidanan manera construccion di dijk, bareranan contra lama, y restauracion di beachnan cu santo artificial. Esakinan ta solucionnan necesario, pero cu tambe lo pone un peso financiero pisa riba e isla.

E problema ta cu nos ta luchando contra un fenomeno natural cu ta parcialmente causa pa actividadnan humano. Mas gasnan drenta e atmosfera, mas grandi e chens cu e aumento di nivel di lama aki lo acelera. P'esey ta crucial pa Aruba no solamente traha localmente riba proteccion di costa, pero tambe uni na esfuersonan internacional pa combati e crisis climatico.

Kico ta sperando Aruba?

A largo plaso, e consecuencianan no lo limita nan mes solamente n'e areanan di costa. Inundacionnan y erosion di costa tambe por conduci na perdida di infraestructura crucial, manera caminda y edificionan construi cerca di e costa. Esaki ta nifica cu gobierno mester ta

prepara pa retonan futuro cu ta bay hopi mas leu cu turismo so.

E falta di accion aworaki, por causa cu e gastonan den futuro lo bira solamente mas halto. Loke ta wordo mira actualmente como un problema abstracto, lo traduci su mes den e proximo decadanan den perdidan hopi tangibel. Y unbes cu e yega asina leu, ta laat pa bolbe bek.

Accion necesario

E aumento di nivel di lama ta un reto cu no por wordo ignora. Aruba mester cuminsa awor cu implementacion di medidanan structural pa proteha e costa. Inverti den proteccion di costa, pero tambe participa den esfuersonan climatico internacional, no ta un escogencia sino un necesidad.

Tempo ta pasando, y sin accion nos ta risca cu no solamente nos beachnan lo desaparece, pero tambe un parti importante di e cultura, economia y comunidad di Aruba.

E impacto ta real, y mas largo nos warda, mas pisa e prijs cu nos lo paga.

Salida Geoffrey Wever

Ta musta mocion di desconfiansa contra lider Ursell Arends

A pesar cu lider di RAIZ Ursell Arends ta insisti cu a pesar di e carta di retiro di Geoffrey Wever lo no afecta nan 'amistad' personal, un caminda e decision di su colega ta pisa manera un bloki di beton na su pianan. Na varios ocasion durante di confrontacionnan serio cu e partner di coalicion esta MEP, Geoffrey a keda para banda di su lider Ursell kende practicamente a convence su persona pa subi lista di RAIZ pa eleccion di 2021.

Tanto Ursell como Geoffrey practicamente for di nada, a bin haya nan mes ta cargando responsabilidad den gobierno MEP-RAIZ ya cu tur dos a opta pa un puesto den Gabinete di Wever Croes II, na luga di bay sinta den Parlamento pa atende asuntonan di interes di pueblo. Segun Ursell e carta di retiro di su colega y 'amigo' Geoffrey lo no mishi cu nan amistad di algun aña caba y cu esaki lo sigui existi hasta despues cu Geoffrey a dicidi di banda e organizacion politico di RAIZ, den porta di eleccion.

Ya cu e anuncio oficial di Geoffrey riba su retiro di RAIZ, practicamente ta net dos siman prome cu partidonan tin cu entrega nan lista di candidato na CENSO, confirmando un biaha mas cu Geoffrey den lenguahe crioyo, a dal lider Ursell un 'cara abou'.

Sin duda cu e decision aki tin su consecuencianan serio pa partido RAIZ ya cu e ta perde un candidato cu a trece mas di 1400 voto den ultimo eleccion pero tur cos ta musta cu Geoffrey a haya un oferta mucho mas atractivo caminda e lo por 'prolonga' su carera sea como Minister of como miembro di Parlamento.

Inicialmente varios rumor a musta cu Geoffrey lo tabatin acuerdo pa uni su mes n'e partido Futuro di Gerlin Croes pero ta practica-

mente mesun cos si el a keda den RAIZ ya cu ta prome bes cu Futuro ta bay participa na un proceso electoral y e lo bolbe den e rol di 'duo dinamico' cu lider di partido Futuro, pues e lo keda den mesun situacion politico cu e tabata aden cu RAIZ y Ursell Arends.

Sinembargo e posibilidad ta grandi cu Geoffrey lo subi lista di partido MEP caminda e lo ricibi un posicion den e prome cinco puestonan riba e lista geel y e hecho cu el a anuncia su retiro na mes momento cu Glenbert Croes a entrega su carta di retiro, ta lanta e impresion cu Geoffrey Wever lo bira e proximo number 4 riba lista di MEP.

Ta mas cu logico ya cu MEP cu ta perde Glenbert kende a logra 1929 voto na 2021, su sucesor den persona di Geoffrey a logra un total di 1430 voto cu tambe ta algo impresionante y caminda e lo sigura un puesto como miembro di Parlamento of como Minister di partido MEP bolbe logra un acuerdo pa un gobierno di coalicion.

Loke ta importante di e decision di Geoffrey t'e hecho cu practicamente el a duna lider di partido RAIZ, esta Ursell Arends, un mocion di desconfiansa of manera na Hulandes ta ser bisa, el a duna su colega un 'brevet van onvermogen'.

A pesar cu lider di RAIZ ta insisti cu nan ta bon amigo, cu nan tin respet pa otro, ta practicamente imposibel pa hustifica salida di Geoffrey for di e partido cual a brinda un inicio sublime den su carera politico.

E decision aki ta confirma Geoffrey Wever no ta mira futuro politico p'e 'plataforma' di Ursell Arends, esta RAIZ den e proximo eleccion na luna di December venidero y ta premira un caida formal di RAIZ pa loke ta cantidad di voto!!

Pa motibo etico Geoffrey Wever mester baha como Minister

DEN Parlamento n'e momentonan aki, tin dos parlamentario kendenan a declara nan mes independiente pero a dicidi di keda cu nan asiento den parlamento, loke ta posibel y hasta por ser hustifica.

Ta trata di Gerlien Croes y Rycond do Nascimento y na momento cu nan como miembro di Parlamento a dicidi di bandona fraccion di AVP, nan a dicidi di bandona fraccion di AVP pero a dicidi di no entrega e asientonan cu nan a logra como miembro di partido AVP.

Sinembargo e situacion aki ta cambia totalmente na momento c'un politico ta cargando responsabilidad como Minister den un Gabinete na mando pero ningun momento un minister den un Gabinete por dicidi di bandona un di e partidonan cu ta forma e coalicion y pretende di por keda como Minister den number di e partido cu e tabata representa. Geoffrey Wever a anuncia su retiro for di RAIZ pero ningun momento a menciona cu e lo baha tambe como Minister demisionario, un puesto cu a bira posibel pa motibo cu RAIZ tabata forma parti di e coalicion cu MEP.

Geoffrey tabata miembro di un partido politico cu tabata insisti riba integridad den gobernacion di e pais y e tabata sostene e

maneho y vision di su ex-lider Ursell Arends y a vocifera esaki den varios declaracion duna na medionan di comunicacion. Awor na momento cu Glenbert Croes a entrega su retiro tanto como Minister y como candidato riba lista di partido MEP p'e proximo proceso electoral, ta resulta cu Geoffrey Wever a dicidi cu e por haci algo parecido caminda el a entrega su retiro como miembro di RAIZ pero ta dicidi di keda como Minister den representacion di RAIZ.

E cos ey no ta klop, tampoco esaki por wordo hustifica ya cu Geoffrey no por pretende cu e no ta cu RAIZ mas pero si kier sigui den e puesto di Minister cu RAIZ na haci posibel pa su persona y aki realmente ta musta di otro asunto caminda e falta di integridad, no ta ser aplica manera mester ta. Geoffrey tin cu entrega su retiro awe si realmente e ta kere den gobernacion integro y e por aplica pa pago di 'overbrugginstoelage' cual e tin derecho ariba p'asina e por sigui dilanti sin falta di salario.

E comportacion aki tambe por ser cualifica como un acto di corrupcion, algo cu lider Ursell Arends a tilda chauffeurnan di bus di ta haci cu nan permisonan di taxi pero loke Geoffrey Wever ta haciendo cu e puesto di Minister, ta caso igual ya cu e no ta forma parti mas di RAIZ cu as haci posibel cu e por a 'actua' como minister pa tres aña largo.

E peso di un bataya legal prolonga:


80 luna di incertidumbre pa dos sospechoso absolvi y nan famia

DEN un sistema hudicial cu ta priminti husticia y solucionnan rapido, ta alarmante pa presencia casonan manera esun di e dos sospechosonan di e caso Alpina na Aruba. A pesar cu e individuonan aki a wordo absolvi mas cu dos aña pasa, nan calvario ta leu di caba. Ministerio Publico (OM) a haci uzo di su derecho pa apela e decision inicial, lagando e caso cay den un pesadiya legal di 80 luna cu a afecta no solamente e sospechosonan pero tambe nan famia.

E apelacion, cu a tuma mas cu dos aña pa wordo trata den corte (Hof), finalmente ta programa pa conclui den e siguiente simannan. Sinembargo, e aspecto mas asombroso di e caso aki t'e castigo relativamente minimo cu OM ta buscando (Z. 130 dia (ya sinta) y T. 6 luna condicional). Esaki ta lant'e pregunta: *Pakico e dos individuonan aki y nan famianan mester a soporta incertidumbre y stress prolonga pa loke ta, den e panorama general, un peticion di sentencia menor?*

E daño personal causa pa un investigacion y huicio cu ta abarca casi shete aña no por wordo subestima. E peso psicologico riba ambos sospechoso y nan famia ta inmenso. Nan mester a enfrenta scrutinio publico, carganan financiero, y e posibilidad constante di un veredicto di culpabilidad. Pa 80 luna, nan no por a sigui dilanti cu nan bida, atrapa den un limbo unda cada decision y plan pa futuro ta wordo opaca p'e caso legal sin resolve.

Den un comunidad chikito manera Aruba, e impacto riba reputacion so



por ta devastador. Famianan hopi biaha ta carga e peso di e batayanan legal di nan ser keri, enfrentando stigma social, relacionnan tenso, y hasta dificultad economico debi na gastonan legal of e incapacidad pa concentra riba carrera of negoshi.

Mientras cu e decision final ta acercando, e ta lant'e pregunta: *E sistema legal mester wordo permiti pa prolonga e sufrimento di individuonan y nan famia pa tanto tempo, specialmente ora e castigo ta asina abou?* E caso Alpina ta sirbi como un spiertamento di e daño emocional y psicologico causa pa batayanan legal prolonga. *Mientras cu OM tin e derecho pa apela, ta hustificabel pa lastra un caso te n'e punto cu e ta bira un forma di castigo riba su mes?*

Cu e conclusion di e calvario di 80 luna aki na horizonte, nos por solamente spera cu lesnan lo a wordo siña y cu casonan den futuro lo wordo trata cu mas urgencia y sensibilidad p'e bidanan real cu ta wordo afecta. E derecho na husticia no mester bin na costo di dignidad humano y bienestar.



**HOOFDSTEMBUREAU
ARUBA**

ANUNCIO PA ESNAN INTERESA PA TRAHA NA URNANAN ELECTORAL

Dia 6 di december 2024 lo tin eleccion pa miembronan di Parlamento di Aruba. Pa es motibo Hoofdstembureau ta informa cu lo cuminsa tuma number di e personanan interesa di sinta como miembro na e urnanan electoral riba e dia di eleccion. Conforme articulo 37 di nos Ordenansa Electoral e miembronan di urnanan mester ta personanan cu tin derecho di voto, es decir mester tin nacionalidad Hulandes y mester ta registra na Registro Civil y Censo prome cu 18 september 2024 y dia di eleccion tin 18 aña bay ariba.

Pa e presidentenan y presidentenan suplente di e urnanan nos lo desea di invita personanan den enseñanza, of otro profesionalnan, of personanan cu experiencia amplio den e funcionnan aki.

Esnan interesa por manda un e-mail na afspraken@censo.aw cu e siguiente informacion: number(nan) y fam, fecha di nacemento y menciona e urna, si den pasado bo persona a yega di traha na urna caba.

Personanan cu wordo acepta lo ser notifica na tempo y por escrito di nan aceptacion.



12 DI CTOBER 2024

GRÀND OPENING

christmas department

12 di october 2024

6:00PM - 9:00PM

• GRUPO DI BETICO

• DJ SKY • SANTA BOOTH • TASTINGS

Do it Center.
Camacuri



DOITCENTERARUBA



DOITCENTERARUBA



DOITCENTERARUBA



Turismo sostenibel:

Hype di mercadeo of impacto real?

E sector di turismo ta un di e pilarnan principal di e economia di Aruba. Cada aña, Aruba ta atrae cientos di miles di turista cu ta bin disfruta di e beachnan bunita, resortnan luhoso y e clima ideal. Pero cu e popularidad creciente aki ta bin un responsabilidad grandi, specialmente riba e tereno di turismo sostenibel. Aunke hopi hotel y resort ta gaba cu nan supuesto maneho ecologico, e diferencia entre promesanan di mercadeo y impacto real hopi biaha ta grandi. Ta tempo p'e siguiente gobierno di Aruba pone exigencianan estricto n'e sector hotelero pa tuma accion real y no keda pega den un sistema di greenwashing.

E cambio necesario den sector hotelero

E presion riba e recursonan natural di Aruba ta birando mas grandi cada aña. Aunke hopi hotel y resort ta promove nan mes como eco-amigable, den practica ta

resulta cu e afirmacionnan aki hopi biaha ta poco mas cu mercadeo. Un programa di serbete unda nan ta wordo laba menos frecuente of sirbiendo platonan local ta djis gota riba un piedra cayente. Hopi di e negoshinan aki ta sigui uza cantidadnan grandi di awa y energia, mientras cu nan no ta tuma suficiente medida pa realmente reduci nan impacto ecologico.

E siguiente gobierno mester trece cambio den esaki. Reglanan mas estricto ta necesario cu ta obliga companianan pa ta transparente tocante nan impacto real riba medio ambiente. Esey no ta nifica solamente inverti den energia renobabel, pero tambe tuma pasonan serio riba e tereno di maneho di desperdicio, uzo di awa y proteccion di ecosistemanan vulnerabel, manera nos rifnan di coral.

Stop greenwashing, cuminsa sostenibilidad

Greenwashing – unda companianan ta presenta nan mes mas berde cu nan ta – mester wordo atendi pa gobierno. Hopi hotel y compania turistico ta yama nan mes 'berde' of 'sostenibel', mientras cu nan ta haci esfuersonan minimo. E problema ta sinta tambe den e falta di normanan y guia cla. E siguiente gobierno mester establece criterionan cla pa turismo sostenibel, pa asina companianan no por djis pone seyonan berde sin haci un diferencia real.

Ademas, ta crucial pa controla si companianan ta cumpli cu e normanan aki. Gobierno mester introduci inspeccionnan mas estricto y duna multanan pisa na companianan cu no ta cumpli cu e exigencianan. Ta solamente asina nos por mantene e credibilidad di turismo sostenibel na Aruba y preveni cu e ta keda djis un truco di mercadeo.

Proteccion di nos rikesanan natural

E fluho creciente di turistanan ta trece un otro problema cune: sobre-turismo. Atraccionnan natural manera e beach y rifnan di coral ta wordo afecta diariamente pa miles di bishitante, locual ta conduci na contaminacion di medio ambiente y deterioro di ecosistemanan. E siguiente gobierno mester interveni den esaki y tuma medidanan pa reduci e presion riba areanan natural vulnerabel. Esaki por wordo haci door di limita e cantidad di bishitante na cierto luganan y door di introduci reglanan mas estricto pa actividadnan turistico manera buceo y snorkeling.

Tambe mester obliga hotel y resortnan pa haci nan infraestructura mas sostenibel. Asina e consumo di awa y energia por wordo reduci considerablemente door di implementa tecnica y solucionnan miho. Esaki no ta un luho, pero un necesidad pa proteha nos rikesanan natural pa futuro generacionnan.

Responsabilidad di e sector hotelero

E sector hotelero na Aruba mester tuma su responsabilidad y contribui activamente na sostenibilidad. Esaki no por sigui ta opcional; e tempo di medidanan parcial a pasa. Turismo por keda un fuente di entrada sostenibel pa Aruba, pero solamente si nos tuma pasonan real awor pa reduci nos impacto ecologico. Gobierno mester tuma e liderazgo den esaki y obliga e sector pa cumpli cu nan promesanan berde.

Hotel-, resort- y companianan turistico mester wordo obliga pa inverti den energia sostenibel, maneho di desperdicio efectivo y practicanan eco-amigable cu ta proteha e isla. E siguiente gobierno mester establece guia y metanan cla y garantiza implementacion estricto. Esaki t'e unico manera cu nos por preveni cu Aruba ta keda pega den un sistema di greenwashing cu eventualmente lo dañe nos naturalesa y economia.

E siguiente gobierno di Aruba tin e tarea pa cera e diferencia entre e mercadeo di turismo sostenibel y e impacto real. Esaki ta posibel solamente door di establece reglanan cla y ehecutable p'e sector hotelero y turistico. Greenwashing mester wordo combati activamente y companianan mester tuma nan responsabilidad pa realmente contribui na proteccion di e naturalesa unico di Aruba. E tempo pa medidanan parcial a pasa – e futuro di nos isla ta den wega.



Declaracion na prensa:

Incidente Landsrecherche y conducta di prensa



RED Arubiano di Prensa Profesional (RAPP) como e asociacion pa periodistanan na Aruba dedica na stimula e practica liber di periodismo y stimula e standard

di comportacion etico, ta alinea nos mes cu e asociacion di periodistanan Hulandes (Nederlandse Vereniging van Journalisten) den afirma cu nos no ta tuma como nos tarea pa desapropa cierto publicacionnan of sistemanan di traha, tampoco nos kier dicidi ken por of no por eherce e trabao profesional di periodista. Esey lo crea un drempel pa acceso liber na prensa pa tur hende, un punto di salida hancra den nos constitucion, algo cu nos ta para p'e y ta defende, esta libertad di prensa.

E detencion di un reportero diamars ultimo a limita e derecho di e periodista di colecta noticia liber, un derecho cu ta hancra den nos constitucion y tratadonan internacional

(Artikel 10 EVRM). Door di no a opta pa un acercamento menos drastico ta haci e detencion desproporcional pa motibo cu a limita e derecho di colecta noticia liber mas cu tabata necesario, algo cu nos como asociacion ta desapropa pasobra e ta mina libertad di prensa.

P'esey nos como asociacion ta boga pa trece mas guia y acuerdonan mutuo entre institutonan y prensa na Aruba pa asina por keda eherce e trabao di periodista liber. Como asociacion nos kier percura p'e puntonan di salida basico, e guia internacional di etica periodistico (Code van Bordeaux) y e principionan di RAPP, sirbi como base pa eherce e trabao di periodista. Na final tur medio y tur periodista tin cu carga nan responsabilidad y esaki ta pa mantene nan mes na ley, n'e limitenan di sociedad y tambe na loke e mesun publico ta spera di nos.



Our assortment of **Kooyman Paint** has the perfect mix of quality and value. Locally made and formulated for Aruba's tough climate, you'll find an endless palette of colors and possibilities.

Visit us for our expert advice. Buy all the paint supplies you need, in-store or online at **[kooymanbv.com/painthub](https://www.kooymanbv.com/painthub)**

DI TODO UN POCO PA REFLEXIONA

DEN tur cayente di campaña, Husticia a pone man riba Minister Glenbert Croes, relaciona cu e caso Portulaca, cu a bin ta ser investiga for di algun luna caba. Su abogadonan ta masha rabia, pasobra nan no a haya oportunidad pa asisti nan cliente, esta Glenbert Croes. Mester bisa cu e Minister ta un sospechoso, maske cu a “detene” y inmediatamente a ser hiba pa Mariniers Kazerne. E interrogacion cu lo sigui lo determina kico lo bira e siguiente paso(nan).

MANERA mester ta, Prome Minister Evelyn Wever Croes (prima di Glenbert) a ser notifica dor di Ministerio Publico di e siguiente paso cu nan tin di haci, esta lo detene Minister Glenbert Croes como sospechoso. E hecho aki a bira un “breaking news” diamars mainta.

MEP a bin ta acusa AVP como Universidad di Criminalidad, pero awor ta resulta cu MEP a bira Academia di Criminalidad Avanza ta logra titulo di Phd. den actonan criminalidad.

MEP a bin ta boga cu si un di su mandatario/parlamentario ta un sospechoso, e lo no por subi lista di e partido. E lo conta tambe pa Glenbert Croes, cu manera a ser menciona, te awor ta ser considera un sospechoso den e caso di Portulaca. (Den pueblo ta bisa cu e number ta PORTUPLACA)

MESUN MEP a trata di saca Benny Sevinger (AVP) for di Parlamento, pasobra e ta un sospechoso den caso di corrupcion. No a logra, pero lo contrario subi lista di AVP na nr. 29, Benny Sevinger a saca su mes y bira Parlamentario atrobe. Ata Otmar Oduber, sospecho den caso Flamingo, cu na November awor lo ser trata, pero a lansa su mes como lider di PPA y participa na proximo eleccion. Si Otmar Oduber saca cu mes, e lo wordo permiti pa bira Parlamentario?

ATA Landsrecherche un dama Hulandes) kier yuda converti Aruba den un Politiestaat, ora sin identifica cu mes, a dicidi di detene Marko Espinoza como e ta bin ta haci su trabao. E reportero a keda priva di su libertad pa 3 ora. Claro e hecho aki a duna Aruba, atrobe un mal number den exterior, ora cu e hecho aki a ser denuncia na SIP y n’e organisacion Hulandes di periodistanan. SIP sigur lo sigui vigila e caso aki y den proximo congreso, Aruba sigur lo bin riba agenda pa determina si tin Libertad di prensa na Aruba of no.

TIN un dicho cu ta bisa: No coba un buraco pa otro, pasobra bo mes por cay aden. Esaki ta valido relaciona cu e ley art. 17 di Integridad di Minister y/of un Parlamentario. Ta MEP a bin cu e ley aki, despues cu Minister Paul Croes a keda deteni, igualmente ora cu Benny Sevinger a ser considera un sospechoso, Otmar Oduber, siendo Minister den Gabinete Evelyn Wever Croes. Ta net un Minister den funcion, Glenbert Croes a bira e mandatario, pa cual el a haya e ley aki pa ehecuta, cu unabes un sospechoso, mester entrega su retiro.

NOS a anticipa caba cu e welga den algun haf na Merca, sigur tin su efecto riba prijs di productonan importa for di Merca. Danki Dios despues di 3 dia di negociacion e partidonan a haya otro, causando cu e daño no t’asina grandi. Siman pasa nos a →



CENTRALE BANK VAN ARUBA

COMUNICADO

Banco Central di Aruba (BCA) ta informa cu e moneda conmemorativo di plata di 5 Florin “Cabay di Awa” ta obtenibel desde 10 di oktober 2024 na BCA.

E Cabay di Awa ta landa den e awanan rond di Aruba y ta un di e atraccionnan mas grandi pa e amantenan di buceamento y snorkel. Aruba ta e hogar pa un variedad grandi di Cabay di Awa den diferente color y grandura: e Cabay di Awa mas grandi y mas conoci tin un grandura di 19 centimeter. E Cabay di Awa ta come bestia chikito di lama, incluso cabaron masha chikito, y ta prefera di sconde den coral, serca di e fondo di lama. Esaki ta hacie hopi biaha dificil pa detect’e. E Cabay di Awa ta un di e animalnan mas special na Aruba.

Specificacion:

Metal:	Plata (925/1000)
Diameter:	38 mm
Peso:	25 gram
Calidad:	Proof
Denominacion:	5 Florin
Prijs:	Afl.170,00



Pa mas informacion por tuma contacto cu Departamento Cash Operations & Logistics di BCA na telefon 525-2139.

Pa compra: Caha di BCA na J.E. Irausquin Boulevard 8, mainta entre 8:30 y 11:45 y merdia entre 1:15 y 3:30.

tuma nota di un proposicion cu ATIA a haci na Gobierno, unda e.o. lo mester elimina cobranza riba CIF-waarde, cu ta inclui cobranza di e producto, seguro y flete. Asina ta cobra e ora ey, e tarifa cu ta di un Douane-Waarde. ATIA for di 2021 caba a manda Gobierno un proposicion, pa elimina cobranza di seguro y flete den e tarifa y cobra solamente e tarifa di "Free on Board", esta FOB. Di e forma aki lo yuda comunidad, comercio, stimula economia. Pero te awe dicho conseho no a keda acepta, menos ainda ehecuta. Bo ta kere cu un decision asina por ser tuma ainda den Parlamento? NO, HAMAS, pasobra tur partido ta den campaña y asina nan tur ta pretende di tin pueblo CENTRAL?

DUNA retiro na Director di Arubus, tabata e miho solucion p'e compania? Awor Minister Ursell Arends ta laga sa cu si y cu el a aplica un acuerdo di e Minister di Transporte anterior, cu tabata di MEP, pero SHON t'abo a tuma e decision. Y riba dje a duna sr. Mohamed un Goldenhand Shake di como mey miyon florin di pueblo. Esaki ta un decision responsabel? A yuda soluciona e problema di transporte publico? NO, e situacion no a cambia nada. Ursell Arends y su partido RAIZ no por haya nunca mas confianza di pueblo pa dirigi e pais aki. Ta problema so el a crea durante maneho di su Ministerio.

NA Colombia, banda di Santa Martha, a descubri un pos grandi di gas. A pesar di esaki, asina mes Colombia tin cu sigui importa gas, asina Presidente di EcoPetro, Ricardo Roa a laga sa. E pos di gas a ser detecta n'e Proyecto cu ta ser yama Sirius. E compania cu a descubri e pos di gas aki ta Petrobras di Brazil.

CUANTO ta costa pa extradita e gas di Sirius, no por menciona cifra ainda, pero e ta u n Proyecto cu lo por dura te 2031. Un funcionario di Gobierno di Presidente Gustavo Petro a duna di conoce cu e costo pa saca e gas aki ta core di 3.000 a 4.000 miyon di dollar.

NOS ta trece e noticia aki, pasobra cu Repsol a haci su investigacion rond di awa di Aruba, a determina cu no tin petroleo, cu un posibilidad

chikito di haya gas. Repsol a dicidi di entrega y tabata Minister Glenbert Croes, kende a logra firma un MOU cu Armstrong Petroleum & Gas, kendenan, sin haci algun studio, a laga sa cu tin gas y lo bay explora esaki. For di e tempo ey nada a tuma luga. Otro fatamorgana di Minister Glenbert Croes. E pos di gas Sirius banda di Santa Martha, Colombia ta basta cerca di Aruba. Y p'esey e pregunta, tin gas den awanan teritorial di Aruba?

OTRO siman diabierna, pueblo lo conoce lista di candidato di cada partido politico, cu kier participa na proximo eleccion. Ta ser calcula, cu 12 pa 13 partido lo participa na eleccion binidero. Dos partido sigur, AVP y MEP lo presenta lista cu 29 candidato y ningun otro mas. E siman y principio di otro siman, lo bira tenso pa pone nan candidatonan. Diabierna otro siman, lo conoce e candidatonan y e ora ey lo sa con pueblo lo por vota.

POR ultimo, e retiro di Geoffrey Wever for di RAIZ, no tabata un sorpresa. Pa awor bin bisa cu su vision no ta cuadra mas cu esun di RAIZ, ta un mentira, y lo keda amigo di Ursell Arends. E lo bira candidato nr. 2 di FUTURO. Otro siman nos lo dedica na formacion di listanan, cu diabierna dia 18 awor lo keda entrega.



'TIS THE SEASON TO JINGLE
Christmas Dinner & Dance Party
@Renaissance Convention Center

DATE: Monday, December 23, 2024
TIME: 7:30pm – 12:30am
Afl. 95.00 per person

- All-You-Can-Eat Christmas Buffet
- Cash Bar in Aruban Florin
- Door Prizes
- Welcome Drink

Entertainment by:
Edjean Semeleer from 7:30pm-8:30pm
TSUNAMI & Megateca Genie from 8:30pm-12:30am

For More Information, Please Call: Jaysley at 5236405 /
Magaly at 5236404 / Sue-Ann at 5236403

R
RENAISSANCE®
CONVENTION CENTER



Aruba ta cumpli?

E rol di balornan den politica

DEN cada democracia funcional, balornan ta forma e fundeshi riba cual lidernan politico ta construi nan ideologia, forma nan decisionnan, y conecta cu e publico. E balornan aki—integridad, husticia, igualdad, y responsabilidad—no ta djis principionan abstracto; nan t'e base di cualkier sistema politico cu ta funciona den e interes di e pueblo. Pero ora nos wak Aruba awe, nos por honestamente bisa cu nos panorama politico ta guia p'e balornan aki? Nos lidernan ta actua cu transparencia, husticia, y respet pa dignidad humano? Ta tempo pa nos puntra nos mes e preguntanan dificil.

Guiando ideologia politico: *Balornan ta n'e centro?*

Ideologia politico, sea ta liberalismo, conservatismo, of progresivismo, ta construi riba un set di balornan central cu ta dicta con un sociedad ta wordo goberna. Na Aruba, nos hopi biaha ta tende promesanan di husticia, igualdad, y libertad economico, pero e balornan aki realmente ta guiando e plataformanan di nos partidonan politico? Nos lidernan ta comprometi na crea un sociedad unda libertad, husticia, y oportunidadnan igual ta accesibel pa tur hende? Of ta djis palabranan lansa pa segura votonan, solamente pa wordo lubida unabes cu e temporada di eleccion termina?

Si nos decisionnan politico no ta wordo impulsa pa balornan genuino, nos ta keda c'un sistema bashi unda e necesidadnan real di e pueblo ta tuma un asiento patras p'e ambicionnan personal di algun hende. E pregunta cu nos mester puntra t'esaki: Nos realmente ta mira liderazgo impulsa pa balor na Aruba awe?

Decisionnan di politica: *Nos ta scogiendo corecto riba robes?*

Decisionnan politico mester ta radica den un sentido di loke ta corecto y husto pa sociedad. Pero na Aruba, nos lidernan ta tumando decisionnan di politica cu ta refleha e idealnan aki? Un lider cu ta balora husticia social mester ta combatiendo desigualdad di entrada, siguiendo cu cada ciudadano tin acceso na cuida medico di calidad y educacion. Un lider cu ta balora libertad economico mester ta trahando pa reduci interferencia innecesario di gobierno, permitiendo negoshinan local pa prospera.

En cambio, nos hopi biaha ta presencia decisionnan cu ta parece mas impulsa pa ganashi politico cu pa preocupacion genuino pa loke ta miho pa Aruba. Disparidadnan economico ta sigui aumenta, cuida medico ta keda inadecuado, y reforma di educacion hopi biaha ta wordo neglisha. Unda e compromiso na balornan ta? Unda e curashi politico pa priorisa e necesidadnan di e mayoria riba e codicia di e poco?

Confiansa publico: *Nos lidernan a gan'e?*

N'e curason di cualkier sistema politico ta confiansa. Votadonan mester kere cu nan lidernan ta trahando p'e bon comun, actuando

cu integridad y honestidad. Pero ora confiansa ta wordo kibra—ora lidernan no ta cumpli cu nan promesanan of ta wordo gara den actonan di corrupcion—henter e sistema ta faya. Na Aruba, confiansa publico a wordo erosiona pa escandalo, promesanan kibra, y un cultura politico cu hopi biaha ta falta responsabilidad.

Nos mester puntra nos mes: Nos realmente ta confia nos lidernan pa actua cu integridad? Nan ta wordo teni responsabel ora nan no ta cumpli? Confiansa no ta algo cu por wordo exige; e ta algo cu mester wordo gana door di accionnan, no palabranan. Sinembargo, e pregunta ta keda: Con frecuente nos ta mira nos lidernan biba segun e balornan cu nan ta pretende di representa?

Conectando cu e pueblo: *E ta genuino?*

Liderazgo berdadero ta mas cu djis ocupa un cargo. E ta tocante conecta cu e pueblo, compronde nan luchanan, y ofrece solucionnan real. Lidernan mester wordo impulsa pa balornan cu ta resona cu e electorado—libertad, seguridad, igualdad, y progreso. Pero na Aruba, con frecuente nos ta mira conexionnan genuino entre nos lidernan y e pueblo cu nan ta sirbi?

Hopi biaha, compromiso politico ta parece di termina ora e campaña termina. Promesanan bashi ta wordo haci pa gana eleccionnan, y unabes cu e votonan ta conta, e promesanan ey ta wordo lubida. Unda e conexion autentico ta? Unda e compromiso pa sirbi e pueblo cu dedicacion genuino na nan bienestar?

Gobernacion etico: *Nos tin e?*

Liderazgo etico t'e base di un democracia funcional. E ta tocante tuma decisionnan cu ta husto, transparente, y den liña cu e dignidad di cada ciudadano. Lidernan cu ta wordo impulsa pa balornan fuerte ta implementa politica cu ta defende derechonan humano, combati corrupcion, y promove husticia. Pero nos realmente por bisa cu esaki t'e caso na Aruba?

Corrupcion, nepotismo, y faboritismo a plaga nos sistema politico pa demasiado tempo. Decisionnan hopi biaha ta wordo tuma tras di porta cera, cu poco consideracion pa husticia of transparencia. Nos tin e liderazgo etico cu nos merece, of nos ta aceptando mediocridad y corrupcion como e norma?

Ta tempo pa un cambio

Aruba ta na un crusada. Nos mester exige miho di nos lidernan politico, teniendo nan responsabel no solamente pa loke nan ta priminti, pero pa con nan ta biba segun e balornan cu mester guia nan accionnan. **Ta tempo pa nos puntra nos mes: Nos lidernan ta actua cu integridad, husticia, y respet pa husticia? Nos ta hayando e gobernacion etico cu nos merece?**

Te ora nos priorisa balornan riba promesanan bashi, te ora nos exige liderazgo real cu ta sirbi e pueblo, Aruba lo keda pega den un ciclo di mediocridad. Ta tempo pa spera mas—y pa tene nos lidernan n'e standardnan mas halto di liderazgo etico, impulsa pa balor.



Pakico marea ciclonico durante horcan por t'asina catastrofico



E marea ciclonico ta un di e elementonan mas peligroso di horcan, ya cu e ta representa un gran menasa pa bida y propiedad den e zonanan di costa. E fenomeno aki ta sosode ora cu horcan ta pusha cantidad grandi di awa di ocean p'e costa, generando un aumento gradual den e nivelnan di awa. Dependiendo di e tamaño y e trayectoria di e tormentam e inundacionnan causa p'e marea ciclonico por dura varios ora pa e bay atras.

Durante un horcan, e nivelnan di awa por yega na supera 6 meter riba lo normal. Ora cu combina cu e olanan poderoso, esaki por causa daño catastrofico. Por ehempel, e marea ciclonico di horcan Katrina na 2005 a provoca e destruccion masivo ora a kibra dijk y inunda New Orleans. Di manera similar, horcan Ike na 2008 a genera un marea di 4,5 pa 5 meter cu a raspa cas riba e peninsula Bolivar, na Texas.

E marea ciclonico ta cuminsa den lama habri, caminda e bien-tonan fuerte di horcan ta pusha e awa, formando un acumulacion. Mientras cu e tormenta ta acerca tera, e haltura di

e marea ta wordo afecta pa factor manera e pendiente di e fondo marino. E areanan di costa cu un fondo marino di pendiente suave, manera esun di Louisiana y Texas, por experiencia marea mas halto compara cu e zonanan di pendiente pronunciada.

E forma di e costa tambe ta influencia. Bahia y rio por canalisa e awa, aumentando su haltura y impacto. Fuera di esey, e mareanan oceanico por fortalece of debilita e marea ciclonico. Si un horcan subi tera durante marea halto, e marea ta pusha ainda mas awa tera aden, manera cu a sosode cu horcan Isaias na 2020.

Por ultimo, e aumento di e nivel di lama debi na cambio climatico ta empeora e efectonan di e marea. E awa mas calor ta expande y e dirtimento di e gletsjerman ta eleva ainda mas e nivel di lama, permitindo cu e mareanan ciclonico yega mas leu y causa mas daño.

E combinacion di factor aki ta converti e marea ciclonico den un forsa devastador durante horcan.

Intensificacion rapido di Horcan Milton ta lanta debate riba necesidad pa un categoria 6

E transformacion asombroso di Horcan Milton di un tormenta di Categoria 2 pa un di Categoria 5 den cuestion di oranan a lanta preguntanan si e por yega e nivel di un hipotetico Categoria 6. E tormenta, cu a cuminsa como un tormenta tropical di 60 mph diadomingo mainta, a aumenta te na un horcan poderoso di Categoria 5 di 180 mph pa dialuna, un aumento extraordinario di 130 mph den apenas 36 ora. Expertonan awor ta contemplando si e sistema actual pa categorisa horcannan ta suficiente.

Actualmente, e Escala di Biento di Horcan Saffir-Simpson ta limita e categorianan di horcan na 5, sin un designacion oficial di Categoria 6. E escala aki, den uzo desde e añanan 1970, a wordo diseña pa midi e daño potencial di horcannan basa riba nan velocidad di biento. Categoria 5 ta representa tormentanan cu biontonan cu ta excede 157 mph, y n'e velocidad aki, e daño ya caba ta catastrofico, independientemente di e velocidad preciso di biento. Pero e intensificacion explosivo di Milton a lanta combersacionnan tocante si e escala mester wordo actualisa pa refleha tormentanan ainda mas fuerte.



Cientificonan Michael Wehner y Jim Kossin a studia si e intensidad creciente di horcannan, alimenta pa oceanonan mas cayente, por hustifica añadiendo un Categoria 6. Segun nan investigacion, solamente cinco horcan y tifon a yega velocidad di biento di 192 mph desde 1980. Mientras cu nan no ta bogando formalmente pa un Categoria 6, nan ta argumenta cu e discusion ta esencial ya cu cambio climatico ta contribui na eventonan climatico mas extremo, particularmente den regionnan manera Golfo di Mexico, Zuidoost Asia, y Filipinas.

A pesar di e potencial di Milton pa yega e nivel sin precedente aki, otro expertonan ta adverti contra enfoca solamente riba velocidad di biento. Nan ta argumenta cu marehada di tormenta, inundacion, y impactonan den interior por causa daño devastador, independientemente di e categoria di biento di un horcan. Esaki tabata evidente durante Horcan Helene, cu a causa destruccion amplio incluso despues cu el a debilita te na un tormenta tropical pa ora el a yega Carolinas.

E debate continuo tocante si pa introduci un Categoria 6 ta destaca e problema mas amplio di con pa comunica e riesgonan creciente di tempo extremo den un mundo cu ta birando mas cayente. Mientras cu e escala Saffir-Simpson ta keda un herment esencial pa rastreo di velocidad di biento, hopi científico ta kere cu e mester wordo adapta pa refleha e rango completo di e impactonan potencial di un horcan mientras cu tormentanan manera Horcan Milton ta bira mas comun. Mientras cu Milton ta acercando areanan di Peninsula di Florida cu ainda ta recuperando di tormentanan anterior, e necesidad pa comunicacion mas cla y miho preparacion ta bira ainda mas urgente.

MADBOR
Consultancy

Documento Comercial y Support

- Oferta / Presentacion
- Programa di rekisitonan
- Citacion
- Informacion
- Contrato (*den concepto*)

Operacion

- Analisis di Proceso
- Descripcion di Proceso
- Descripcion di Protocol

Apoyo Empresarial

- Mediacion
- Consulencia/ Consejo
- Comercialisacion

Documentacion oficial (di e empresa) :

- Prepara
- Verifica
- Traduccion-4 idioma:
(*Ingles, Hulandes, Spaño, Papiamentu*)

Priva

- Scirbi carta (oficial) - 4 idioma
- Traha Curriculum Vitae
- Carta di solicitud
- Mediacion serca instancianan - 4 idioma

Ban
Papia
+297-7456724

Turning Ideas into Breakthrough Solutions



NOW PLAYING



The Silent Hour

A Boston detective returns to duty after an injury leaves him with permanent hearing loss. Tasked with interpreting for a deaf witness to a brutal gang murder, they find themselves cornered in a soon-to-be-condemned apartment building where the killers try to eliminate her.



The Wild Robot

After a shipwreck, an intelligent robot called Roz is stranded on an uninhabited island. To survive the harsh environment, Roz bonds with the island's animals and cares for an orphaned baby goose.



Joker: Folie à Deux

Struggling with his dual identity, failed comedian Arthur Fleck meets the love of his life, Harley Quinn, while incarcerated at Arkham State Hospital.



Jigra

It is a heart wrenching tale of a sister taking on the world to avenge her brother. Their odyssey of reunification tests their bond, their morals, and their inner strengths. Who wouldn't set the world on fire to protect what's theirs?

For Showtimes and Online Ticketing: www.caribbeancinemas.com

Memey di reclamo di asesinato di lidernan di Hezbollah

Israel ta expande ofensiva terrestre den sur di Lebanon



ISRAEL a intensifica su operacionnan militar den sur di Lebanon door di desplega un di cuater division di tropa den nan lucha cu ta tumando luga contra Hezbollah. Prome minister Benjamin Netanyahu a confirma e morto di Hashem Safieddine, un figura di alto rango di Hezbollah prepara pa tuma luga di e lider di e grupo, Hassan Nasrallah. Safieddine tabata supervisando e operacionnan politico y militar di Hezbollah y no a wordo mira publicamente desde un atake aereo Israeli siman pasa.

Netanyahu a bisa cu Hezbollah ta hopi mas debil despues di morto di Safieddine, yamando esaki 'un organisacion sin

cabes'. Mientras tanto, Hezbollah a responde cu bombardeo continuo di raket, incluyendo mas di 100 raket dirigi n'e ciudad Israeli di Haifa, heridando 12 persona. E ex diputado di Hezbollah, Naim Qassem, a bisa cu e capacidanan di e grupo ta keda intacto a pesar di e atakenan aereo di Israel y e perdida di comandantenan halto.

E conflicto, cu a cuminsa despues cu Israel a lansa atake aereo y terrestre di represalia despues di e atake di Hamas riba 7 di october, a mira Israel intensifica su operacionnan tanto na Gaza como na Lebanon. Mas di 1.400 persona a muri na Lebanon desde mita di september, cu mas di 1.2 miyon di persona desplasa. E militar Israeli ta afirma di a destrui un sistema di tunnel di Hezbollah cerca di e area di Marwahin, cu nan ta kere tabata ser prepara pa infiltra Israel.

Mientras e conflicto ta intensifica, e economia ya fragil di Lebanon ta tambaliando. E waf di Beirut a mira un bahada di 30% den operacionnan, mientras cu e productornan di trigo di e pais ta expresa nan preocupacion pa su capacidad pa planta cultivo p'e proximo temporada. Refugiadonan for di sur di Lebanon y suburbionan sur di Beirut a inunda refugio, incluyendo un centro comercial bandona den Centro di Beirut, cu awor ta alberga centenares di persona desplasa.

Pa hopi den Lebanon, e guerra a trece devastacion na nan cas y medio di sustento. Entre nan ta Reda Mroueh, kende a huy for di sur di Lebanon despues cu e atake aereo a destrui su barberia. Mientras Israel ta expande su operacionnan militar, e residentenan ta teme mas destruccion y un conflicto prolonga cu ta recorda na gueranan pasa.

Stimami. Sterilisami.

REGISTRA AWO

Y BENEFICIA DI NOS SUBSIDIO CU TA CUBRI TE CU 45% DI E COSTO DI STERILISACION DI BO MASCOTA Y UN MICROCHIP GRATIS!

PA MAS INFORMACION BISHITA: WWW.STIMAMISTERILISAMI.COM

Presencia di China na base naval Ream di Cambodia ta lanta preocupacion riba estabilidad regional



IMAGENAN di satellite recién di e base naval Ream di Cambodia a revela e presencia di dos corbeta Chines Tipo 056A, aumentando temor cu China ta expandiendo su presencia militar den Zuidoost Asia. E desaroyo di un pier nobo construi pa China y otro facilidadnan na Ream ta sugeri cu e involucramento di China den e base por ta mas permanente cu gobierno di Cambodia ta afirma. A pesar di cu oficialnan Cambodiano a nenga repetidamente, kendenan ta cita e prohibicion di nan constitucion riba basenan militar stranhero, sospechonan ta persisti relaciona cu e intencionnan a largo plaso di China n'e base strategicamente ubica.

E base Ream di Cambodia, situa riba Golfo di Tailandia, anteriormente a wordo actualisa cu asistencia di Merca te ora cu relacionnan a deteriora na 2017. Desde e tempo ey, gobierno di Cambodia a cambia su asociacion militar pa China, cancelando ehercicionan conhunto cu Merca na favor di e ehercicionan "Dragon di Oro" cu forsanan Chines. Pa 2020, edificionan financia pa Merca na Ream a wordo demoli, y Chinesnan a cuminsa un expansion extenso, culminando den e construccion di un pier grandi cu por acomoda e barconan di guerra mas grandi di China.

Mientras cu Cambodia ta insisti cu e presencia Chines ta temporal y e base ta keda habri pa tur marina amigo, criticonan ta nota cu solamente barconan di guerra Chines a wordo permiti pa mara eyan. Notablemente, durante un bishita di destructornan Hapones mas trempan e aña aki, nan a wordo redirigi na un waf civil cerca. Oficialnan Mericano a expresa preocupacion creciente tocante e implicacion di un presencia Chines a largo plaso na Ream, ya cu imagennan di satellite ta musta e adicon di un waf seco, warehouse, y cambenan pa biba.

E beneficianan strategico potencial di un base Chines na Ream ta significativo. Aunke China ya caba ta opera tres base fuertemente fortifica den Lama di China Meridional,

e base na Ream por proporciona capacidadnan critico di recopilacion di inteligencia, permitiendone China pa monitor actividadnan naval regional. Esaki ta particularmente preocupante pa paisnan bisiña manera Tailandia y Vietnam. Un presencia Chines permanente n'e base por wordo mira como parti di un esfuerzo pa rondona e costa largo di Vietnam, aumentando tensionnan entre e dos paisnan, cu a enfrenta disputanan maritimo den pasado.

E implicacion di e involucramento di China na Ream ta extende mas leu cu Cambodia y su bisiñanan inmediato. Strategistanan di Merca y India ta preocupa cu e base por ta parti di e meta mas amplio di China pa establece un red global di puesto militar, un strategia ya caba mira den luganan manera Djibouti y potencialmente Oceano Indio.

Mientras cu por ta añanan prome cu China por rivalisa e alcance militar global di Merca, e desaroyonan na Ream ta sugeri cu China ta expandiendo su influencia constantemente, cu efectonan potencialmente destabilizador riba seguridad regional.

+297 730 1486
SABANA BLANCO 40
ORANJESTAD, ARUBA

Beauty Bar
P.M.U & LASH ARTIST **By JEN**

Specialised in

Brows, lips & Eyeliner • Pedicure • Microblading
• Powderbrows • Threading • Brow Lamination
• Lip pigmentation & blush • Eyeliner

Beauty Bar by Jen
 beautybar_byjen

MI5 ta alerta

ISIS y al Qaeda cu target pa Europa

REINO Uni ta enfrentando un menasa resurgente di ISIS y al Qaeda, segun Director General di MI5, Ken McCallum. Den un discurso publico inusual, McCallum a alerta cu e organisacionnan terorista aki un biaha mas ta target Reino Uni y Europa, cu ISIS en particular reanudando esfuersonan pa exporta terrorismo globalmente. E resurgimento ta bin cinco aña despues di e caida di e califato di ISIS, cu a abarca Irak y Siria, y a mira e grupo evoluciona den un red descentralisa cu celnan den henter Africa, Medio Oriente, y Asia.

McCallum a destaca cu mas di un tercera parti di e investigacionnan di prioridad recien di MI5 ta conecta cu gruponan terorista den exterior, y alarmantemente, mas di un di cada ocho persona bou investigacion pa ofensanan terorista den Reino Uni ta menor di edad—un aumento tripel desde 2021. E cambio aki ta subraya e influencia creciente di propaganda extremista riba generacionnan mas hoben, particularmente via canalnan online.

E hefe di MI5 tambe a aborda e panorama di seguridad global mas amplio, cu ta wordo impacta pa sabotaje y



terrorismo patrocinado pa estado. McCallum a señala e agencia di inteligencia di Rusia, GRU, como un menasa persistente, acusando e di orkestra actonan di sabotaje y incendio premedita den henter Europa. El a revela tambe cu MI5 a responde na 20 complot terorista apoya pa Iran na Gran Bretaña desde 2022, complicando ainda mas e ambiente di seguridad di Reino Uni.

A pesar di un aumento den desorden publico y crimen di odio debi n'e conflictonan den Medio Oriente, McCallum a declara cu e eventonan aki ainda no a traduci den actividadnan terorista significante den Reino Uni. Sinembargo, el a enfatisa e necesidad pa vigilancia ya cu e potencial pa violencia ta keda.

E naturalesa evolutivo di terrorismo, cu un enfoque mas grandi riba menornan di edad y radicalisacion basa riba internet, ta presenta retonan nobo pa agencianan di seguridad. McCallum a subraya e importancia di responde n'e panorama di menasa cambiante aki, destacando condenanan recien di adolescentenan Britanico involvi den planeamento di atakenan inspira pa ideologia extremista. Cu extremismo di tanto derecha leu como Islamista na aumento, MI5 ta enfrentando presion creciente pa preveni actonan di violencia prome cu nan por wordo ehecuta.

APPAREL

BOAT ACCESSORIES

TODOMAR

f TodomarAruba @TodomarAruba TodomarAruba +297 585 0555

FISHING TACKLE

FIBERGLASS PRODUCTS

SALUD. BEYESA

+ Y Bienestar Personal +


E importancia di autoexamen di pecho den prevencion di cancer di pecho

CANCER di pecho ta un di e canceran mas comun cu ta afecta hende muhe rond mundo. Deteccion trempan ta hunga un rol crucial den mehora e chens di tratamento exitoso y sobrevivencia. Na honor di Luna di Conscientisacion di Cancer di Pecho, ta importante pa destaca e importancia di haci autoexamen di pecho (BSE) regularmente como un paso vital den e proceso di deteccion trempan. Aunke autoexamen no ta reemplaza screening profesional, nan ta un manera proactivo pa hende muhe comprende e aspecto y sensacion normal di nan pechonan, permitiendo nan detecta cambionan potencial mas trempan.

Pakico autoexamen di pecho ta importante?

Autoexamen ta un metodo simpel y efectivo pa controla abnormalidad den e tehidu di pecho. Nan por yuda identifica señalnan trempan di cancer di pecho, manera bulto, cambionan den forma of tamaño, of textura inusual di cuero. E cambionan aki por indica e necesidad pa evaluacion adicional door di un profesional di salud. Hopi hende muhe ta descubri cancer di pecho nan mes durante un autoexamen, haciendo esaki un practica esencial den mantencion di salud personal.

Mientras cu mammogram y examen clinico di pecho t'e metodonan principal di screening recomenda pa hende muhe, specialmente esnan riba 40 aña, autoexamen por wordo haci mas frecuente y na cualkier edad. Nan ta empodera hende muhe pa keda vigilante y tuma responsabilidad di nan salud door di ta familiar cu loke ta normal pa nan. Esaki ta haci mas facil pa detecta algo inusual trempan.



Con pa realiza un autoexamen di pecho

E miho momento pa realiza un autoexamen ta mas o menos tres pa cinco dia despues cu bo periodo menstrual termina, ora bo pechonan tin menos chens di ta hincha of dolor. Hende muhe post-menopausa mester scoge un dia consistente cada luna. E examen por wordo haci tanto dilanti un spiel como mientras ta drumi pa sigura cu bo ta controla tur area di e tehidu di pecho completamente.

Aki tin un guia paso a paso pa realiza un autoexamen di pecho:

Dilanti un spiel:

- Para cu bo schoudernan recht y brasanan riba bo heupnan. Busca cambionan den forma, tamaño, of color di bo pechonan, y controla pa hinchamento visibel of “dimpling” di e cuero.

- Hisa bo brasanan y busca e mesun cambionan. Tambe, controla si bo tepelnan a bira inverti of si tin cualkier descarga.

Mientras drumi:

- Uza bo man drechi pa sinti bo pecho robes y vice versa. Cu movecionnan firme, suave, y circular, uza bo dedenan pa primi abou y controla pa bulto of areanan diki. Sigura cu bo ta cubri henter e area di pecho, for di e clavícula te n'e ribchi y for di bo axila te n'e centro di bo pecho.

Mientras ta para of bañando:

- Hopi hende muhe ta haya mas facil pa sinti nan pechonan ora e cuero ta muha. Uza movecionnan circular similar pa cubri henter e pecho y e area di axila.

Kico pa Busca Durante un Autoexamen

Mientras ta realiza un autoexamen di pecho, tene cuidou pa:

- Bulto of tehidu diki cu ta sinti diferente for di e resto di e pecho.
- Cambionan den tamaño, forma, of simetria di e pechonan.
- Hinchu, cayente, of tehidu cora.
- Descarga di tepel (otro cu lechi di pecho).
- Tepelnan inverti of retracta.
- Cuero cu “dimpling”, parecido na textura di casca di apelsina.

Si bo ripara cualkier di e señalnan aki, ta importante pa consulta un profesional di salud pa evaluacion adicional. Tene na cuenta cu no tur bulto ta cancer, pero solamente un profesional por determina e causa.

E rol di autoexamen den prevencion y deteccion trempan

Aunke autoexamen di pecho no ta preveni cancer di pecho, nan ta hunga un rol clave den deteccion trempan, cual ta critico pa mehora e resultadonan di tratamento. Investigacion ta muestra cu ora cancer di pecho ta wordo detecta trempan y localisa n'e pecho, e tasa di sobrevivencia di cinco aña ta casi 99%. Autoexamen mester wordo uza hunto cu otro metodonan di screening, manera mammogram y examennan clinico, pa cuidu di salud di pecho completo.

Autoexamen di pecho ta un manera simpel pero efectivo pa hende muhe monitor nan salud di pecho regularmente. Aunke nan no ta un substituto pa screeningnan profesional, nan ta empodera hende muhe pa reconoce cualkier cambio trempan den nan pechonan y busca conseho medico si ta necesario.

Incorpora autoexamen den bo rutina mensual ta un paso proactivo den direccion di deteccion trempan, y ora combina cu mammogramnan regular, e ta aumenta e chens di detecta cancer di pecho den su etapanan mas trempan.

E eror di makiyahe di wowo mas grandi cu hende muhe riba 50 ta haci

MIENTRAS nos ta bira mas grandi, makiyahe por sea resalta nos beyesa of sin intencion agrega añanan na nos apariencia. Pa hende muhe riba 50 aña, makiyahe di wowo ta particularmente dificil, y un eror comun por ta strobando bo di logra un look hubenil: no uza “eye primer”.

Pakico eye primer ta esencial despues di 50

E cuero riba nos parpadonan ta bira mas propenso na rimpel mientras nos ta bira mas grandi, causando cu e makiyahe di wowo ta move y acumula den e liñanan fini. Sin un “eye primer”, sombra di wowo no ta keda na su luga, y e rimpelnan ta bira mas notabel. Un bon “eye primer” ta suavisa e parpado, permitiendone un aplicacion mas facil y mas pareu di sombra di wowo, y ta yuda e color dura mas largo sin desvanecer of rimpel. Ademá, e ta intensifica e pigmento, haciendo e sombra di wowo parece vibrante durante henter dia.

E beneficianan di uza eye primer

“Eye primer” ta mantene bo makiyahe na su luga, hidrata e area delicado di parpado, suavisa e textura, y provee un canvas perfecto pa aplica sombra di wowo. Algun di e “primers” mas recomenda ta inclui Chanel’s Le Correcteur, Kiko Milano’s Neutral Eye Base, y Urban Decay’s Primer Potion. E productonan aki ta sigura un acabado mas suave, engrandece e vibrancia di color, y preveni makiyahe di acumula den liñanan fini.

Cuater eror di makiyahe di wowo mas comun cu hende muhe riba 50 ta haci

• **Uza color di concealer robes:** Hopi hende muhe ta opta pa un concealer cu ta mucho cla. Pa cuero madura, esaki por haci e area bou di wowo parece ‘laba’. Scogiendo un concealer



hidratante cu ta match bo tono di cuero ta yuda evita un contraste fuerte cu e resto di bo cara.

• **Scoge sombra di wowo matte of briyante:** Colornan matte y briyante, aunke bunita, por enfatisa liñanan fini y rimpelnan. Acabadonan den satin ta ideal ya cu nan ta refleha luz suavemente, creando un efecto mas sutil y halagador.

• **Defini liñanan dimas:** Liñanan fuerte di eyeliner por ta menos halagador mientras e cuero ta bira mas grandi. “Blend” liñanan rond di e wowonan ta crea un look mas suave y natural cu ta engrandece e wowonan sin parece mucho severo.

• **Ignora color di cabey y cuero:** Makiyahe di wowo mester complementa no solamente e color di bo wowo pero tambe e tononan di bo cuero y cabey. Pa hende muhe cu cabey gris y un tehido palido, uzando colornan demasiado ‘warm’ manera burgundy

por crea demasiado contraste. Balansa e paleta di color general lo yuda logra harmonia.

Hidratacion ta clave

Un otro eror grandi di makiyahe ta no hidrata e cuero adecuadamente prome cu aplica cualkier makiyahe. Mientras nos ta bira mas grandi, nos cuero naturalmente ta produci menos azeta, hibando na segura.

Ta esencial pa uza cremanan rico y hidratante pa mantene e cuero flexibel y suave prome cu aplica cualkier makiyahe. Pa base, formulanan fluido y liviano cu ta ofrece un acabado natural y briyante sin acumula den liñanan fini t’e miho escogencia.

Door di evita e erornan comun aki, hende muhe riba 50 aña por disfruta di un look mas fresco y hubenil cu nan makiyahe.

Manteniendo nivelnan saludabel di testosterona naturalmente

Pa hende homber riba 40

MIENTRAS hende homber ta bira mas bieu, ta natural pa nivelnan di testosterona baha. E hormona aki, cu ta hunga un rol crucial den masa muscular, nivelnan di energia, y vitalidad general, ta cuminsa disminui rond di edad di 30 y ta sigui baha mientras añanan ta pasa. Pa ora hende homber yega nan 40, mantene nivelnan saludabel di testosterona ta bira cada bes mas importante. Afortunadamente, tin maneranan natural pa sostene produccion di testosterona y mantene un balansa saludabel sin necesidad di medicamento.

Priorisa ehercicio regular

Un di e maneranan mas efectivo pa aumenta nivelnan di testosterona naturalmente ta via actividad fisico regular, particularmente training di forza y training di interval di intensidad halto (HIIT). Ehercicionan di resistencia manera hisamento di peso ta yuda stimula e produccion di testosterona di e curpa. Ademá, combinando esaki cu sesionnan di HIIT por provee un aumento mas completo, ya cu e explosionnan cortico aki di ehercicio intenso tambe ta conoci pa mehora produccion di hormona. Participando den actividad fisico regular no solamente ta yuda mantene nivelnan di testosterona pero tambe ta mehora salud general, incluyendo funcion di curason y bienestar mental.

Adopta un dieta cu ta aumenta testosterona

Dieta ta hunga un rol esencial den salud hormonal, specialmente pa hende homber riba 40. Comiendo alimentonan rico den vetnan saludabel, manera awacati, azeta di olijfi, y pisca vet

manera salmou, por sostene produccion di testosterona. Proteinanan sin vet, manera galiña y calacuna, tambe ta esencial pa mantene masa muscular, mientras cu berduranan di blachi, manera spinazie y kale, ta provee nutrientenan vital manera magnesio cu a wordo liga na nivelnan mas halto di testosterona. Ta importante pa evita alimentonan procesa, demasiado sucu, y carbohidratonan refina, ya cu esakinan por contribui na desbalansa hormonal y aumento di peso.

Drumi bon

Soño hopi biaha ta wordo ignora, pero e ta un componente critico di salud hormonal. Hende homber cu ta drumi menos di seis ora pa anochi tin mas chens di experiencia nivelnan mas abou di testosterona. Durante soño profundo, e produccion natural di testosterona di e curpa ta yega su maximo. P'esey, priorisa un rutina di soño cu ta permiti 7 pa 9 ora di descanso pa anochi por haci un diferencia significante. Un bon anochi di soño tambe ta mehora nivelnan general di energia y ta yuda


reduci stress, un otro factor cu ta impacta testosterona negativamente.

Maneha stress y nivelnan di cortisol

Stress cronico ta conduci na nivelnan eleva di cortisol, un hormona cu ta suprimi directamente e produccion di testosterona. Pa hende homber riba 40, maneha stress via tecnicanan manera mindfulness, meditacion, of hasta tuma tempo pa hobbynan y relajacion ta vital pa mantene balansa hormonal. Reduciendo nivelnan di cortisol por yuda e curpa produci y mantene naturalmente nivelnan optimal di testosterona.

Door di enfoca riba un estilo di bida balansa cu ta inclui ehercicio regular, nutricion adecuado, suficiente soño, y maneho di stress, hende homber riba 40 por mantene nivelnan saludabel di testosterona naturalmente.

E habitonan aki no solamente ta sostene salud hormonal pero tambe ta contribui na un sentido general di vitalidad y bienestar.





Mirrors Beauty Academy ta ofrece e siguiente serviccionan

Laba
Corta
Blowdry
Keratina
Cold Wax

Tinja
Highlights / Mechitas
Ombre / Californiana
Bayalage
Peinado

Makeup
Threading
Barberia
Manicure
Pedicure

Y
mucho
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Kibra e silencio, keda bibo!

TEMPORADA di fiesta ta den porta. Un temporada cu ta celebra union familiar cu hopi hende ta celebra cu gratitud y harmonia; un temporada pa crea memoria placentero hunto, pero tambe uno cu tin ora ta crea hopi stress ora tin p.e. abuso, bebemento y desunion den senonan cu por afecta e salud mental di un persona. E falta di un ser keri, cambionan economico y sentimentonan di ta inadecua of hopi otro motibo por hiba un persona na ideanan hopi pisa y e ta haya su mes den un luga scur, den skina di su mente.

Durante e temporada aki, trahadonan den e sector social, medico y policial tin'e hopi druk. Esnan manera Janine Rodriguez di Seccion di Polis Slachtofferhulp sa di a prepara nan mes p'e impacto y efecto cu fin di aña ta trece cun'e den nan trabao. Banda di mira y atende casonan cu ta involvi accident, tin momentonan di crisis causa door di sea trauma, isolacion, depresion of otro motibonan cu consecucionan fatal, sea tardi of trempan; suicidio. E atento di y idealisacion di suicidio ta un tema cu entre otro Levi Silvanie, artista y Mental Health Advocate den islanan ABC y Hulanda ta conscientisando pueblo di dje.

Nos tur por para keto y tira un bista den nos mes y riba otro na un forma cu ta eleva e sentimentonan di balor propio, pero tambe tin balor inmenso den uni y hunto crea un dialogo habri y safe pa conta nos experiencianan personal. E trabao cu ta involvi e curason humano, manehando situacionnan na bienestar di cada un, sigur merece su debido honor, sosten y encurashamento tambe!

Den luz di esaki a nace un iniciativa apoyando un y tur pa por comparti, educa, normalisa y sostene esnan batayando cu emocionnan depresivo, suicidal y di soledad. Den cuadro di reconocimiento di **"Dia Internacional di Conscientisacion di Salud Mental"** riba 10 di october ta anuncia e movimiento **"Keda Bibo"**, cual lo lansa pronto un grupo di apoyo riba facebook.

Ta premira cu e movimiento aki lo crea un impacto social y te hasta cultural pa nos keda "sharp", keda atento y haya den nos mes e motivacion pa saca un man pa yuda otro,



brinda palabra y tuma accionnan cu ta promove un estilo di bida conducivo na normalisa un cultura di honra, eleva y empodera otro den bida.

Esaki lo ta bao di e guia y maneho di Natasha Richardson, un trahado social, Secretaria di Shiloh Foundation y mama di un yiu cu Autismo y Mental Health advocate bao hobennan na Aruba. Cu un team di produccion nan tras, lo ta coleccionando y trahando riba publicacionnan cu ta promove tools pa preveni y combati atento di suicidio y isolacion. Unda servicio publico ta yega su limite y ayudo priva kisas no ta affordable pa tur, Keda Bibo ta sigui pusha y boga pa educa pueblo con pa brinda sosten na otro y baha e drempel pa busca y haya ayudo y sosten adecuado.

Pa cu esaki ta haci un yamada publico na sector priva y pueblo completo pa cu engrandecimento di e plataforma. Interesadonan por contact libremente na empower.kedabibo@gmail.com pa un cita detaya di opcionnan di apoyo material y inmaterial.

Si abo of un familiar ta sufri di pensamiento cu ta idealisa suicidio, por favor, KEDA BIBO y contact bo Dr. di Cas pa referi abo of bo ser keri na profesionalnan.

DEPORTE



DEPORTE@AWEMAINTA.COM

Manchester City ta acusa Premier League di 'gaña' clubnan riba caso legal

MANCHESTER City a acusa Premier League di gaña su clubnan miembro tocante e resultado di un caso legal importante relaciona cu e reglanan di transaccion di partidonan asocia (APT) di e liga. Den un carta manda pa tur 19 club di top-flight, e consehero general di City, Simon Cliff, a critica e resumen di Premier League di e veredicto di e caso, reclamando cu e tabata contene varios inexactitud. Tanto City como Premier League a declara victoria despues di e decision di e panel di arbitrahe dialuna.

E disputa legal ta centra riba e reglanan di APT di Premier League, cu ta regula acuerdonan comercial entre club y companianan liga na nan doñonan. E accion legal di City a desafia e reglanan, y e tribunal a haya dos aspecto di e regulacionnan di APT ilegal. City ta afirma cu e resultado aki ta invalida henter e set di reglanan di APT, mientras cu Premier League ta mantene cu solamente ahustenan menor ta necesario. Premier League awor ta buscando pa modifica e reglanan pa cumpli cu ley di competencia.

Den e carta, City a declara cu e tribunal no a aproba e reglanan di APT, manera Premier League a afirma, y a enfatisa cu e decision tabatin consecuenecianan significante pa acuerdonan di patrocinio pasado y actual. Cliff tambe a adverti contra haci cambio den e reglanan di APT mucho lihe, avisando cu cualkier reaccion impulsivo por conduci na mas procedimiento legal y gasto pa clubnan. El a urgi pa consid-



eracion cuidadoso y reflexion di tur partido prome cu haci cambionan.

Premier League a rechasa e acusacionnan di City, cu un fuente senior rechasando reclamonan di inexactitud den su resumen. E liga ta trahando pa modifica e reglanan dentro di e siguiente dos siman, pero e ekipo legal di City ta preocupa tocante e husticia di aplica e reglanan retroactivamente na acuerdonan di patrocinio pasado mientras ta exclui prestamonan di accionista anterior for di e alcance di e regulacionnan di APT. Esaki por

conduci na mas disputa y reclamonan potencial di compensacion di City.

E disputa aki ta marca un escalacion den tensionnan entre Manchester City y Premier League, mientras cu City ta sigui desafia regulacionnan financiero.

Cu 115 cargo relaciona cu violacionnan di regla financiero ainda ta colga riba e club, e resultado di e caso di APT aki por tin implicacion mas amplio p'e bataya legal continuo, exponiendo ainda mas e divisionnan entre clubnan di Premier League riba regulacionnan financiero.

Helmut Marko ta adverti Red Bull:

Verstappen por sali sin auto ganado

HELMUT Marko, e consehero principal di Red Bull Racing, a bolbe enfatisa cu e team mester drecha cos rapidamente den e ultimo caredanan di e temporada. Segun e Austriaco di 81 año, tin un chens real cu Max Verstappen lo considera otro opcionnan den futuro si Red Bull no por dun'e e auto adecuado pa competi na top. *"Esey ta sigur algo cu e lo pensa riba dje,"* Marko a bisa den un entrevista cu RTL/ntv y sport.de.

Marko a subraya cu Verstappen no ta necesariamente enfoca riba kibra record di coredonan legendario manera Michael Schumacher of Lewis Hamilton. *"Max kier gana ora e ta den e auto, pero e ambiente mester ta bon,"* segun Marko. *"Si e perde e placer, un dia bo por spera cu e dicidi di stop."* Marko a confirma tambe cu Verstappen, mescos cu hopi otro coredo di top, tin un clausula di salida relaciona cu prestacion den su contract. Pues si Red Bull no por dun'e e auto corecto, e sigur lo considera sali.

Sinembargo, e situacion di e compañero di team di Verstappen, Sergio Pérez, ta hopi diferente. A pesar cu e Mexicano en prin-

cipio tin un asiento segura p'e siguiente temporada, Red Bull ta spera miho prestacion di dje. Marko a splica cu Pérez tin dificultad mas frecuente pa adapta rapidamente na cambionan den e auto, cual segun e ta un di e motibonan pakico McLaren actualmente tin un duo di coredo mas fuerte. *"Su inconsistencia ta birando mas y mas impredecibel,"* Marko a agrega. A pesar di e retonan aki, Pérez ta optimista cu e por termina e temporada fuerte. Sinembargo, Marko a adverti cu prestacion t'e unico garantia den Formula 1. *"Den e deporte aki bo ta haya seguridad solamente si bo ta presta,"* el a bisa, indicando cu e futuro di Pérez den e team ta keda insegur si e no ta presta.

Finalmente, Marko tambe a refleha riba e regreso di Daniel Ricciardo n'e team ruman Visa Cash App RB. Aunke Ricciardo a wordo mira como un yiu perdi cu por a revitalisa su carera, el a decepciona. Su prestacionnan inconsistente a pone cu e mester a entrega su asiento na Liam Lawson. *"E speranza pa un resurreccion lamentablemente no a materialisa,"* Marko a conclui, refiriendo n'e falta di consistencia den e velocidad di Ricciardo.



INTERPASO

2024

Oktober 25 - 26 - 27



Oktober 25
Welcome event & Halloween Celebration

Oktober 26
Competencia di Cabay

Oktober 27
Competencia di Jinetes & Amazonas














Capitan di Ryder Cup di Merca ta alerta riba atmosfera intenso na Bethpage Black

CAPITAN di Ryder Cup di Merca, Keegan Bradley, a expresa preocupacion tocante e atmosfera potencialmente hostile na Bethpage Black durante e Ryder Cup di 2025. Papiando na un conferencia di prensa hunto cu capitan Europeo Luke Donald, Bradley a enfatisa cu siguridat lo ta presente paden pa segura cu e publico di New York, conoci pa su pasion, no ta crusa e liña durante e evento di alto riesgo programa pa 26-28 di september 2025.

“Mi tin fe completo den e fanaticonan di New York pa anima nan ekipo cu orguyo y fuerte,” Bradley a bisa. *“Pero mi no kier pa nan haci nada cu lo afecta e curso di wegá.”* El a subraya cu siguridat lo ta monitoriando e situacion pa mantene e competencia husto pa ambos ekipo. Bradley, un nativo di noordoost di Merca, a compara e evento proximo na hunga na luganan iconico di alto presion manera Yankee Stadium y Madison Square Garden.

Bethpage Black, un cancha publico cu un reputacion pa tanto su dificultad como su multitud bullicioso, a organisa torneonan grandi anteriormente, incluyendo e U.S. Open y PGA Championship. E diseño dificil di e cancha y e fanaticonan di New York ta anticipa pa crea un ambiente desafiante, particularmente p’e ekipo Europeo bishitante. Bradley a asegura ambos ekipo cu PGA of America lo haci tur cos necesario pa asegura un atmosfera husto y competitivo.



Capitan Europeo Luke Donald a reconoce e intensidad di e wegá na Ryder Cup pero a enfatisa e importancia di mantene e spiritu di e wegá. *“Ryder Cup ta special pasobra e ta spiritual. Pasionnan ta halto. Energia ta halto,”* Donald a bisa.

Sinembargo, el a subraya cu e integridad di e competencia no mester wordo poni den peligro pa comportacion inapropia di e publico, confiando cu PGA of America lo maneha cualkier interrupcion.

Ambos capitan a confirma cu nan lo sigui considera hungadonan di LIV Golf si nan cumpli cu e criterionan di eligi-

bilidad. Brooks Koepka tabat’e unico hungado di LIV den e ekipo di Merca na 2023, mientras cu streaman Europeo Jon Rahm y Tyrrell Hatton, cu despues a join LIV, ainda por ta eligibel pa seleccion den futuro.

Mientras cu emocion ta aumenta p’e Ryder Cup di 2025, ambos ekipo lo ta preparando pa un competencia feroz y spiritual na Bethpage Black, unda e atmosfera ta anticipa pa ta mes desafiante cu e cancha mes. Cu medidanan di siguridat na nan luga, Bradley y Donald ta confia cu e evento lo muestra e miho di e evento mas patriótico di golf.

Payroll Pro HRM ta anuncia distribuidor y mercado nobo

GAMMA IT Solutions ta orguyoso pa anuncia su partner nobo cu ta One Source Business Solutions y asina ta drenta e mercado di Barbados cu Payroll Pro HRM.

Riba october 8, e acuerdo entre Gamma IT Solutions y One Source Business Solutions a keda firma oficialmente. Un cantidad di compania a atende e evento aki cu a tuma luga na Sky Mall Haggatt Hall na Barbados, unda nan a wordo introduci na e software.

Payroll Pro HRM ta un software pa payroll y recurso humano cu ta conoci den henter region Caribe. E la wordo desaroja pa Gamma IT Solutions. Payroll Pro HRM tin mas cu 30 aña riba mercado y tin partnernan den henter Caribe cu ta bende, implementa y duna soporta na tur cliente.

One Source Business Solutions ta un compania dedica na duna solucion tecnologico na diferente compania nan. Nan tin mas cu 30 aña di experiencia y ta traha cu varios partnernan y experto nan den e industria. Nan tin un ekipo capacita cu ta duna nan cliente solucion nan innovativo y personalisa. Y aworaki nan ta e distribuidor autorisa di Payroll Pro HRM na Barbados.



E director di One Source Business Solutions, Paul Bennett, ta comparti “Payroll Pro HRM sigur lo ta valioso pa tur organizacion na Barbados. E lo yuda cu un procesamiento di payroll mas lihe, eficiente y cu ta cumpli cu tur ley di labor y belasting.”

Gamma IT Solutions ta orguyoso di por ta partner di One Source Business Solutions, un compania cu nan ta confia completamente pa introduci Payroll Pro HRM na e mercado di Barbados.

Koos Veel, director di Gamma IT Solutions ta comenta “Nos ta hopi contento di por expande y introduci nos software na un mercado nobo. Nos tin e confiansa cu One Source Business Solutions tin e motivacion y experiencia pa yega na hopi cliente na Barbados.”

Payroll Pro HRM ta wordo uza pa clientenan na Aruba, Corsou, Bonaire, St. Maarten, St. Eustatius, Saba, Surinam, Jamaica, Guyana y awo Barbados.

COME IN WE'RE OPEN

CAYA HARMONIA 1. LOKAAL 2
NOORD (PATRAS CITGO SASAKI)

Designed by @junglecfe

Con prepara Aruba ta si surgi un otro Pandemia

RECIENTEMENTE representantenan di Universidad di Wageningen Hulanda tawata na Aruba pa eherce un investigacion cu e meta pa inventarisa e risico pa desaroyo di malesanan infeccioso aki na Aruba y alabes pa evalua con prepara Aruba ta pa si bin un epidemia of pandemia como consecuencia di esakinan.

E investigacion aki ta basa riba cuater grupo di malesanan infeccioso cual ta entre otro malesanan transmiti por medio di awa of aire, transmiti pa bestia (zoönosis) y transmiti pa sangura (vector borne diseases).

Meta di e investigacion ta pa prepara esnan cu ta traha riba maneho (beleid) y stimula cooperacion entre stakeholders pa ta prepara riba eventual brotenan di malesanan infeccioso cu por surgi riba nos isla.



E investigacion aki ta wordo eherce conhuntamente cu Universidad di Aruba y e resultado di e investigacion aki lo mester bay conduci na desaroyo

di un proyecto den Caribe riba e topico 'Con prepara e islanan Aruba, Bonaire y Curaçao ta pa enfrenta un posibel Pandemia'.



COMFORT, FOOD AND COCKTAILS





FOR SHOWTIMES AND ONLINE TICKETING:
WWW.CARIBBEANCINEMAS.COM

📞 787-999-3292

📷 @caribbeancinemasaruba

📺 Caribbean Cinemas Aruba

DOWNLOAD OUR APP



Despues di hopi aña Brandweer Aruba ta ricibi uniform nobo



SIMAN pasa, Minister di Husticia y Asuntonan Social sr. Rocco Tjon tawata presente n'e post di Brandweer situa na Tanki Flip, caminda a entrega e uniformnan nobo na henter e personal di Cuerpo di Bombero.

Minister Tjon a gradici sindicato cu a sostene henter e proceso aki, como tambe e comision cu a haci esaki posibel. Ta trata di un comision cu ta consisti di cuater trahado di brandweer mes, kende a haci nan investigacion p'asina saca afo, cua t'e miho uniformnan cu por busca p'e personal.

Ministerio di Husticia y Asuntonan Social ta percura pa pone e fondonan disponibel y e trabou mes ta wordo haci door di e trahadonan, pa cual nan ta haya e espacio pa por haci e trabou aki, pa na final di dia e escogencia ta cumpli cu e deseo di e trahadonan.

Segun e miembronan di comision, tur personal cu ta traha na Brandweer tin nan uniform, bluspakken y perslucht entre otro, p'e añanan nos dilanti. Pues, esaki ta nifica cu nan tin tur e ekiponan cu nan tin mester di dje pa por eherce nan trabou na un manera sigur pa nan mes, pero tambe pa brinda un miho servicio na nos comunidad.

Por ultimo, e mandatario a splica cu diferente inversion a tuma luga e añanan cu a pasa, inversionnan den proyectonan infrastructural, pero tambe material cu a wordo cumpra, manera truck, asina por menciona cu e ladder truck nobo a yega Aruba. Pues, den e presupuestonan cu lo sigui, lo tene cuenta cu e aspecto aki p'asina por sigui garantiza cu por sigui adkiri uniformnan y material cu e ekipo di Brandweer tin mester di dje.



Hunto cu Fundacion pa nos Comunidad

Introduccion di proyecto piloto di entrega cuminda cayente pa adultonan mayor



DEN colaboracion cu FPNC Aruba, Ministerio di Asuntonan di Adulto Mayor ta introduci un proyecto piloto sumamente importante. E proyecto piloto aki, cu lo tuma luga over di un periodo di 4 luna, ta encera entrega di cuminda cayente na un grupo vulnerabel di 65-plussers cu ta registra na FPNC, cu no tin suficiente entrada pa por sigura un cuminda diario pa nan mes.

“Nos ta consciente cu tin un crecimiento den e grupo di adulto mayor cu no tin un entrada fiho of tin un entrada limita cu ta causa cu nan ta sufri di inseguridad alimentario y malnutricion. Den colaboracion cu FPNC e proyecto piloto aki lo yuda pa eleva nan calidad di bida,” Minister Arends a duna di conoce.

“Esaki no ta solamente pa nan salud fisico, pero alabes lo haci uzo di e momento di entrega di cuminda pa kibra e isolacion social door di combersa y comparti un momento ameno cu e adulto mayor. Pa nos e iniciativa aki ta mas cu djis un entrega di cuminda, e ta un oportunidad pa nos comunidad realisa cu nos adultonan mayor mester di cada un di nos y asina stimula participacion civico pa cu esnan den necesidad.”

E proyecto lo start cu entrega nan diario di cuminda

cayente durante siman, y adicionalmente, lo inclui dos bes pa siman un pakete di desayuno. Ta premira cu e proyecto lo yuda por lo menos 50 adulto mayor rond di Aruba den e fase inicial, cu plan pa amplia e proyecto.

Minister Arends ta enfatisa cu cuida di nos adultonan mayor ta di suma importancia pa nos comunidad. Colaboracion cu sosten y aporte di instancianan social por yuda coregi problemanan di inseguridad alimentario entre esnan cu ta mas vulnerabel den nos comunidad, specialmente nos adultonan mayor.

Ministerio di Asuntonan di Adultonan Mayor hunto cu FPNC lo traha man den man cu partnernan manera Voedselbank pa coordinacion, restaurantnan pa preparacion di cuminda pa asina cumpli cu e necesidadnan di cada participante den forma mas optimal posibel. Minister Arends ta agrega cu lo monitor e proyecto piloto aki di cerca y evalua con por stimula mas participacion pa di e forma aki por, no solamente sigura e continuacion di e proyecto a largo plaso, pero tambe subi e cantidad di adulto mayor vulnerabel cu por wordo asisti, garantizando asina cu nos adultonan mayor por keda biba mas largo den nan mesun cas, cu ta locual hopi di nan ta desea.



Detector di huma; Lag'e funciona pa bo!

WILLEMSTAD – For di diadomingo 6 te diasabra 12 di october 2024, Cuerpo di Brandweer Corsou ta pone atencion n'e Siman di Prevencion contra Candela, cu e meta pa conscientisa publico riba peliger di candela den cas. Den cuadro di e siman aki, cu ta tin un importancia vital pa proteha bida, e bomberonan lo bishita diferente bario y lo reparti detector di huma pa yuda preveni accidente tragico.

Lamentablemente na aña 2023, Corsou a cera e aña cu un total di 7 persona cu a perde nan bida durante di un candela. Esaki mes a duna empuhe na Brandweer su departamento di Prevencion pa bolbe inicia cu charlanan informativo den barionan pa conscientisa nos hendenan riba prevencion di candela. Diaranson 9 di october, Brandweer lo ta 6or di atardi na Centro di Bario Seru Papaya (Seru Fortuna) pa duna informacion relaciona cu prevencion di candela, y tambe lo tin oportunidad pa hendenan di e bario por ricibi un detector di huma gratis cerca Brandweer Corsou.

Riba diabierna 11 di october, e experto lo splica kico hende por haci pa preveni candela den cas, y con un detector di huma por salba bida n'e area di Banda Bou, na Colegio Ellis Juliana/Sheila Karel, na momento cu nan lo ta 6or di atardi n'e scol aki tambe, pa duna informacion relaciona cu candela

Caso di tiramento cu herido

WILLEMSTAD - Diamars 8 di october 2024 alrededor di 18.06'or, Central di Polis a ricibi diferente yamada di un caso di tiramento cu a tuma luga den Caya Fin Fin.

E prome unidad cu a yega na e sitio, a topa un homber cu herida di bala na e parti ariba di su curpa. Mesora a pidi presencia di ambulance cu a yega na e sitio y a transporta e victima pa Sala di Emergencia di C.M.C.

For di investigacion preliminar, testigonan a declara cu despues cu nan a tende tiro, nan a mira un homber sali na careda na pia y despues huy for di e sitio.

Investigacion den e caso aki ta continua.



y su prevencion.

Un detector di huma, por salba bo bida, y ta p'esey, e aña aki, Brandweer su departamento di Prevencion a scoge e lema: Detector di Huma; Lag'é funciona pa Bo! Un detector di huma por duna un alarma den un fase inicial cual ta duna tempo pa sali for di cas, y evita tragedia. Cu esaki, nos ta invita tur hende pa asisti e charla informativo y tuma parti n'e esfuerzo pa proteha bida y propiedad di candela.

RECETA DI DIA



Greek Yogurt Peanut Butter Protein Bow

E dushi snack proteico aki di yoghurt griego cu pindakaas ta ideal pa cualkier momento di dia. Rico den proteina y cu un toke di chuculati, ta perfecto pa esunnan cu ta busca un opcion nutritivo y rapido. Prepar'e den algun minuut y disfruta di un dessert salu-dabel cu tambe ta yuda mantene bo energia.

Ingrediente:

1 cup di greek yoghurt (yoghurt Griego) (225 gram)
1 scoop di proteina di vanila na polvo (30 gram)
1 ½ cup di polvo di pindakaas (aproximadamente 24 gram)
1 cuchara di pindakaas cremoso (16 gram)
½ di chuculati sin sucu of chocolate chips (opcional)

Instruccion:

1. Den un comchi mediano, mescla e yoghurt Griego cu e proteina den polvo di vanila te ora cu e ta bon integra.
2. Añadi e polvo di pindakaas y sigui mescla te ora cu obtene un textura diki.
3. Agrega e cuchara di pindakaas cremoso y mescla bon.
4. Si bo ta desea, incorpora e chuculati sin sucu of e chocolate chips pa dun'e un toke extra di sabor.
5. Sirbi di inmediato of warda den frigidaire pa disfruta mas despues.

Cla! Un receta simpel, dushi y halto den proteina.



Fortaleza pa Famia

Cana den e luz di nos Señor Cristo Hesus

LAGA boso luz briya dilanti di hende, di tal manera, cu nan por mira boso bon obranan y glorifica boso Tata cu ta den cielo (Mateo 5:16).

Lampi di e curpa t'e wowo, asina ta cu si bo wowo ta bon, henter bo curpa ta yen di luz, Ma si bo wowo ta malo henter bo curpa lo ta yen di scuridad. Asina anto, si e luz cu ta den bo ta scuridad, ki grandi ey scuridad lo ta (Mateo 6:22-23).

Ta nos deber como mayor y ciudadano pa nos tur haci oracion pa nos hubentud sali for di e scuridad, cu ta purba tur manera pa wanta nan den su gara, Si nos hubentud mester di nos oracion, pasobra sin oracion nos lo bay sinti hopi tristesa y dolor.

Apostol Pablo a bisa Timoteo: No laga ningun hende menosprecia bo hubentud, ma mas bien den palabra, conducta, amor, fe, y puresa demostra bo mes di ta un ehempel, p'esnan cu ta kere.

Nos hubentud mester por duna bon ehempel y demostra cu nan mayornan a guia nan den bon caminda, dunando testimonio, di e educacion cu nan a ricibi na cas.

Cristo Hesus a libra nos for di scuridad diabolico y a pone nos den Su luz.

P'esey e palabra ta bisa nos bon cla:

Pasobra antes boso tabata scuridad, ma awor boso ta den luz di Señor, cana como yiunan di luz. Pasobra e fruta di e luz ta consisti di tur bondad y husticia y berdad. Tratando di siña locual ta agradabel na Señor, no participa den obranan infructifero di scuridad, sino mas bien expone nan (Efesionan 5:8-11).

Mester splica na nos hubentud, pa asina nan por kere den Señor.

Esaki t'e condenacion, cu e luz a bin den mundo, y hende tabata stima e scuridad mas cu e luz y no tabata bin n'e luz pa su hechonan no wordo exponi (Juan 3:19-20).

Hechonan di scuridad y inmoralidad dia pa dia ta birando mas pio, e falta di respet, e rechazo di e palabra di Dios y e falta di temor di Dios, e uzo di palabra malo, e falta di pordon, e violencia den famia, aumento di bruheria, y divorcio, awor mas cu nunca a lanta cabece.



Ta di lamenta cu inmoralidad y abominacion, ta wordo aproba di dia cla, pasobra malo ta wordo yama bon, y bon ta wordo yama malo. Y eynan nos hubentud ta wordo distrai y pa falta di conocimiento nan ta cay den scuridad.

Tur hende cu ta cana cu arma ta cana den scuridad.
Tur hende cu ta den bicio di droga ta den scuridad.
Tur hende cu ta den bicio di alcohol ta den scuridad
Den tur cas caminda tin rebeldia y maltrato tin scuridad.
Tur mayor cu ta comete adulterio ta den scuridad.
Tur mayor cu no ta respeta nan yiunan ta den scuridad.
Tur mayor cu tin trabao y no ta cria nan yiunan ta den scuridad.
Ora nos bida no ta agrada Dios, scuridad ta rondona nos.

E ora ey Hesus a bolbe papia cu nan bisando: Ami t'e luz di mundo, esun cu sigui Mi lo no cana den scuridad, ma tin e luz di bida (Juan 8:12).

Y esaki t'e mensahe cu nos a tende di dj'E y ta anuncia na boso, cu Dios ta luz y den dj'E no tin nada, nada di scuridad.

Ta tempo pa nos guia nos hubentud cu hopi amor n'e luz di bida cual ta nos Señor Cristo Hesus, Su luz semper t'ey pa nos.

Sinceramente, Pastoor Marcel Balootje

Santo di Dia

Ehempel di fe inkebrantabel

Awe ta Dia di San Daniel y su compañeronan martir

DIA 10 di october, Iglesia Catolico ta celebra e fiesta di San Daniel y su compañeronan martir, un grupo di shete Franciscano cu a duna nan bida pa nan fe den siglo XIII. E hombernan aki, manda como misionero pa Maroko, a sufri martirio door di a nenga na renuncia na nan creencia den Cristo.

Kende nan tabata?

San Daniel, sacerdote Franciscano for di Calabria, Italia, tabata lider di e grupo. Hunto cu su seis compañeronan, a sali cu e proposito di evangelisa tera musulman. Den e epoca aki, den nort di Africa tabata un region caminda cu cristianismo no tabata acepta y caminda e misioneronan tabata enfrenta riesgo grandi. Sinembargo, movi p'e profundo amor pa Dios y p'e deseo di comparti e Evangelio, e hombernan cu curashi aki a cuminsa cu un mision peligroso.

E martirio

Na Maroko, San Daniel y su compañeronan a cuminsa predica abiertamente e fe cristian. Esaki a conduci na nan aresto y hiba dilanti autoridad. A duna nan e opcion di renuncia na su fe, pero tur, sin duda, a prefera, sin duda, a prefera morto prome cu traiciona nan creencia. Nan a wordo ehecuta na 1227, convirtiendo den martir y un ehempel di fe y curashi p'e futuro generacionnan.

E legado di San Daniel

E testimonio di San Daniel y su compañeronan martir ta sigui ta recorda p'e curashi cu cual nan a defende nan fe y pa nan fidelidad n'e principionan cristian. Nan martirio no solamente a inspira e otro misioneronan pa continua



hibando e mensahe di e Evangelio, sino cu tambe a subraya e importancia di e libertad religioso, un tema cu ta resona den e mundo contemporaneo.

Den actualidad, San Daniel y su compañeronan ta venera como recordatorio

cu fe por ta un fuente di fortaleza hasta den e momentonan mas dificil. Su fiesta ta invita pa reflexiona riba e importancia di e sacrificio y e compromiso cu e balornan spiritual, inspirando e creyentenan pa mantene firme den nan conviccion.

Celebracion 10 aniversario di Parokia San Juan Pablo II


PAPA Francisco a canoniza Papa Juan Pablo II dia 27 april 2014 como Santo. 18 mei 2014 Obispo Luis Antonio Secco a inaugura un parokia nobo na Aruba, esta Parokia San Juan Pablo II. E aña aki ya nos ta celebra 10 aniversario di nos Parokia pero tambe Canonizacion di nos Patrono.

Esaki sigur ta motibo pa celebra p'esey nos kier invita parokiano y devotonan pa compania nos den e nobena y preparacion spiritual pa fiesta Patronal San Juan Pablo II cual lo ta diadomingo 20 october 2024.

Programa di nobena y celebracion
Fiesta Patronal 2024 – 10 aniversario

Diabierna, 11 october 2024
Nobena pa 5:45 pm y sigui cu Santo Sacrificio di Misa pa 6.30 pm

Diasabra, 12 october 2024
Nobena pa 5:15 pm y sigui cu Santo Sacrificio di Misa pa 6.00 pm



Gradicimento:

Nos ta gradici tur esnan cu di un forma o otro tabata cu nos na momento cu "Tantan" Fela a sera su wowonan.

Maria Rafaela Croes

Gradicimento ta bay na tur esnan cu a atende y compaña nos na entierro, manda krans, yamadanan telefonico y mensahenan via whatsapp.

Ta gradici tur sobrina /o nan, bon bisiñanan, prima/o nan, lhanan, comer y compernan, tur famianan y specialmente grupo Palmita di Oro.

Ta gradici Legion di Maria, Mario Werleman y su grupo di Oracion.

Cu tantan Fela su alma por descansa na pas.

Diadomingo, 13 october 2024
Nobena pa 8:15 am y sigui cu Santo Sacrificio di Misa pa 9.00 am

Dialuna te cu Diabierna, 14 - 18 october 2024
Nobena pa 5:45 pm y sigui cu Santo Sacrificio di Misa pa 6.30 pm

Diasabra, 19 october 2024
Nobena pa 5:15 pm y sigui cu Santo Sacrificio di Misa pa 6.00 pm

Diadomingo, 20 october 2024
Santo Sacrificio di Misa pa 9.00 am

Celebracion Fiesta Patronal di parokia San Juan Pablo II y sigui despues cu un brindis pa tur presente.

"Sin Dios la sociedad acaba deshumanizada". (San Juan Pablo II)



Ku bos haltu mi ta sklama na Senjor
ku bos duro mi ta grita ousilio, ta
deshoga mi kurason serka dje dune
E di konose tur mi anshanan. Mi
kurason por ta serka di kai ma Abo
,Senjor, sa unda mi ta bai

Cu profundo tristeza na nos curazon nos ta anuncia fayecimento di:

Augustin Hilario Valdéz

Mihor conoci como: "Buchi"
*28-08-1949 †07-10-2024

Acto di entierro lo wordo anuncia despues.



Lagrima y floran por seca, su recuerdonan y tur loke el a haci y significa pa nos, lo keda graba pa semper den nos mente y curason. "Cerca Dios mi alma ta na paz, ta di DJ'E mi salvacion ta bin"
Salmo 62:1

Cu dolor na nos curason, nos ta participa fayecimento di nos ser stima:

Juan R. Tromp

Cariñosamente yama "Robby of Juancho"
*27-12-1946 - †01-10-2024

Acto di entierro lo wordo anuncia despues

Beautiful memories
silently kept
Of one that we loved
and will never forget



Ami ta resurreccion y bida; esun cu kere den Mi lo biba asta si e muri.
Juan 11.25

Cu dolor na nos curason,pero conforme cu bolundad di Dios nos ta participa fayecimento di nos ser stima:

Sra. Vda. Maria Anna Giel Tromp

✠22 december 1940 – †8 oktober 2024

Su esposo:
†Antonio Giel

Su yiunan:
Teofilo y Marina Giel-Carvajal
Mario y Natasha Giel-Hernandez
Anna Maria Giel

Su prinsesnan:
Vanesa Kellsy
Melissa Keyla
Kyrach

Rumannan:
†Cornelis Tromp
† Juan y Carmen Tromp-Hayde
† Pablo Tromp
† Gabriel Tromp
Filomena y Mario Farro-Tromp
Dora y Luis Jansen-Tromp

Sua- y cuñanan:
Cecil y Leonora Giel-Figaroa
Juan y Rosalba Giel-Ossa
Victor y Anita Giel-Velazquez
Francisco y †Filomena Giel-Wolff
†Bernardo y †Filomena Giel-Figaroa
Emiliano y †Norma Giel-Jacobs
†Filomena y †Irving Yarzagaray-Giel
Jossy y Olga Giel-Velazquez
Tomas y Maria Giel-Wolff
Catharina Giel
Mariana y Hubert Croes-Giel

Tur su subrino- y subrinanan, primo- y primanan, comer- y compernan, suegro- y suegranan, ihanan ta invita demas famia, bisiña, amistadnan pa asisti na e acto di despedida y entierro.

E restonan mortal lo ta den Misa Santa Anna pa 3.30 y tin oportunidad pa condoleer te cu 4or. Respons ta cuminsa 4.00pm, despues di cual lo hiba nos defunto na su ultimo lugar di sosiego.

Lo tin oportunidad pa condoleer na Aurora Funeral Home:

Diahuebs di 7.00 pa 9.00pm

Diabierna di 1.00 pa 3.00pm

Enbes di flor of krans por haci un donacion pa nos Kapel di Alto Vista. Lo tin un caha disponibel na Aurora Funeral Home.



"Dios ta amor... y amor ta Dios, maske mi no ta na e mundo aki, tur dia lo mi ta banda di boso Curazon, mi por stens di loke Señor ta hasi". - Salmo 33

Cu dolor na nos curason nos ta anuncia fayecimento inespera di nos ser stima:

Jaco Peter
Gesterkamp

*12-06-1964 – † 06-10-2024

Na number di su:

Casa:
Alexandra Gesterkamp-Sint Jago

Yiunan:
Joshua y Yadira Gesterkamp-Dania
Joanne van der Lee y Imry Zievinger
Helen Gesterkamp y Xëander Tromp
Brandon Gesterkamp

Mayornan:
† Jacobus Gesterkamp
Vda. Helena Gesterkamp-Hoogendoorn

Rumannan:
Tom (Jethro) y Carmen Gesterkamp-Mosquera y famia
Wouter y Lee Gesterkamp-Alberts y famia
† Tanja Kervel-Gesterkamp y Ramon y famia

Tanta:
Vda. Tante Els Veenstra-Hoogendoorn
Primo(a)nan den exterior, Sobrino(a)nan na Aruba y den exterior, iha, bon bisñanan, bon amigonan y tur su coleganan di AMC Unicon/Unicomer

Sua nan y Cuña:
Orlando y Glenda Sint Jago
Enrique Sint Jago y Astrid Webb
† Edwin (Eddy) y Beatrix Sint Jago y famia
Desiree y Eddy Vrolijk y famia
Alexander y Emma Sint Jago y famia

Suegro y Suegra :
† Nuestro (Nico) Sint Jago y Vda. Lucia Sint Jago-Bislip

Demas famia:
Gesterkamp, Hoogendoorn, Sint Jago, Dania, Zievinger, Tromp, Mosquera, Alberts, Kervel, Wiley, Koolman, Stamper, Marcuchi.

Ta invita demas famia, bisña, amigo y cono-cir nan pa asisti na e acto di despedida cu lo tuma lugar **Diahuebs, 10 di October 2024** for di 9or pa 11or di mainta na Aurora Funeral Home. Acto di cremacion lo tuma lugar den seno familiar.

Embes di manda flor of krans lo tin un donation box disponibel pa Aruba Heart Foundation.

Nos ta lamenta despues di entiero nos no lo por ricibi bishita di condolencia na cas.



"Dios ta amor... y amor ta Dios, maske mi no ta na e mundo aki, tur dia lo mi ta banda di boso Curazon, mi por stens di loke Señor ta hasi". - Salmo 33

Cu dolor na nos curason, pero conforme cu boluntad di Dios, nos ta participa fayecimento di nos mama stima:

Sra. Albertina Franken

Cariñosamente yama
"Betty"

*07-08-1938 - † 07-10-2024

Acto di entiero lo wordo anuncia despues



"Señor ta mi wardador, mi'n tin falta di nada.
Den cunucu di yerba berde e ta ponemi sosega.
E ta hibami na awa frankil,
pa mi bolbe haña forsa".
Salmo: 23

Cu profundo tristeza na nos curazon nos ta
anuncia fayecimento di:

Sergio T. Maduro

Mihor conoci como: "Papa Theo/ Superman"
*23-01-1969 † 08-10-2024

Na number di su:

Casa:
Carmen Maduro Bonalde

Mama:
Fransisca Maduro

Tata:
Mario Maduro

Yiunan:
Milenne Maduro
Serge Maduro & Gritsanne Maduro
Shandrea Maduro
Emeli Bonalde
María Bonalde
Robert Bonalde

Manera yiu:
Errol Salazar

Mama di su yuinan:
Sheila Tromp

Rumannan:
Marion & Famia
Sharole & Famia
Romulo & Famia
† Robertino
Angelo & Famia
Donald & Famia
Arnold & Famia
Anouschka & Famia

Nieto/nietanan:
Serganne, Sergion, Sheilane, Shadday, Matthew,
Thiago, Paula, Kethleen & Kiara

Amigo nan di cas:
Johnny, Balentino, Gabriel, Toni & Albert (Flaco)

Sobrino, sobrina, prima, primo, tanta, omo y
amigo di beach

Nos Disculpa si den nos tristeza nos por a lubida
cualquier famia of cono-cir.

Acto di despedida lo tuma lugar na Aurora
Funeral Home **Dialuna 14 di Oktober 2024** di 2or
pa 4or di atardi. Cremashon lo tuma lugar den
seno familiar.

Nos ta lamenta cu despues di entiero nos no ta
ricibi bishita di condolencia na cas.



Gradicimento & Invitacion

Na number di henter henter famia di:

Eusebio Benjamin Ruiz

Nos kier a gradici cada un persona cu di un
manera of otro a tuma tempo pa bin dispidi di
nos "Tata" of "Chemito" stima.

Un danki na esnan cu a manda carchi, krans,
whatsapp, e-mail, mensahe riba Social Media y
a haci yamada nan telefonico.

Danki na su verpleegster nan di Wit Gele Kruis
Aruba & su verpleegster di cas Sra. Magaly
Tromp.

Un danki special na Dr. M. v/d Ham pa su
tremendo atencion, tempo, dedicacion y apoyo
duna na nos defunto stima y famia.

Na Dr. Texier pa su bunita palabra nan di sosten.

Na Staff & Personal di Aurora Funeral Home &
Pastoor Jairo Maduro pa boso bon servicio y
atencion.

Na demas famia, bisñanan, amigo y
conocirnan.

Boso muestra di atencion ta di hopi aprecio
y un gran sosten pa nos y alaves ta invita pa
tres Santo Sacrificio di Misa pa descanso di
nos defunto cu lo tuma lugar na Misa Santa
Filomena na Paradera:

Diahuebs, 10 october 2024 pa 7:00pm
Diabierna, 11 october 2024 pa 7:00pm
Diasabra, 12 october 2024 pa 7:00pm

Boso presencia lo ta altamente aprecia.



Gradicimento / Invitacion

Na number di famia nos kier a gradici cada
un cu a tuma nan tempo pa expresa nan
condolencia y esnan cu a bin
dispidi di nos ser stima:

Rino Wentwoord

Boso muestra di atencion ta di hopi aprecio y
un gran sosten pa nos.

Un danki special na: dr. Inge Algera, Mireille
Eerdmans-Laaf, dr. Nienke Smits y Remo Kock,
Randy Brown, Tom Nijhuis, Fleur Aartntzen,
Delis Herrera, Stella Gonzalez y personal di
HOH.

Tambe na Aurora Funeral Home pa nan bon
servicio y atencion.

Ta invita pa asisti na un Santo Sacrificio di
misa cual lo tuma luga na Misa Santa Ana na
Noord, diaranson 9 di oktober,
diabierna 11 di oktober y
dialuna 14 di oktober 2024
pa 6.30'or di anochi.



Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



noticia@awemainta.com
aviso@awemainta.com